

Chijnie ndo Jesús chronga ndo Juan

Ngisen chronga xranchi jii ndo Dio kuij nti i nunte xasintajni

¹ Ti xrangíxixín xrako a nunte xasintajni ó jii chijni ko chijni me e ndo Cristo, ko je e ndo bakekao ndo ndo Dio ko je e ndo ndo Dio ndo.

² Ti xrangíxixín bakekao ndo ndo Dio,

³ ko ixí je e ndo Cristo, ndo Dio juinchéña ndo kain nge e jii. Ko ninaa nge e jii xrokuake a siá xrakuajon a ndo juachaxien ndo xrobake e.

⁴ Je e ndo kuajon ndo juachaxin jichón kain nge e ko je e ndo naa xro i tingasáña ngajin chujni.

⁵ Ko xro i me e tingasáña ti naxixe e ko ti naxixe e jua i nchekanga xro i.

⁶ *Bake e naa ngisen tsixrua an ndo Dio, ndo me e ndatin in ndo Juan

⁷ ixí xrochronga ndo kondee xro i me e ixí kain chujni tsitikaon na xro i ixí nge e xrondachro ndo.

⁸ Ko ndo Juan je a je e ndo xro i me e. Je e ndo je o xrochronga ndo kondee xro i.

⁹ Xro i nduaxin xro i tingasáña kain chujni ó jitií xro i nunte xasintajni.

¹⁰ Chijni jian, ndo Cristo, ó jii ndo nunte xasintajni, ko maski ndo juinchéña ndo nunte, chujni ste nunte xasintajni kuichúxin a na ndo.

¹¹ Kuij ndo ngajin ni judío, ni tjajné e ndo, ko kuayé a na ndo.

¹² Ko ikaxin sen kuayé e sen ndo ko kuitikaon sen ndo, kuajon ndo juachaxin ngajin sen ixi xrokjan sen chjen en ndo Dio.

¹³ Sen me e je a xranchi tjongí e naa chjen en naa chujni jaña tjongí e sen. Na i. Ó chjen en ndo Dio je e sen.

¹⁴ Ko chijni, ndo Cristo, je e ndo ikjan ndo chujni ko bake e ndo ngajinna ko tjaunna ndo ko ti nduaxin ndachro ndo. Ko ó bikona juachaxien ndo, juachaxien chjen en Ndotáina Dio, xjan naakuaxon.

¹⁵ Ndo Juan nichja ndo ixi ndo Cristo ko ndachro ndo:

—Ji i ngisen ntatjunta nchakon ndachrjan, tjume e tsií inaa ngisen ícha tetuan an, ixi ó sa ó jii ndo ixi najan an.

¹⁶ Kainna ó kuaye ena juachaxin tjintee tajon ndo, ko nchennaonna ndo kain nchakon.

¹⁷ Ley kuetuan an ndo Dio juinchenoına ndo Moisés, ko ti tjue e ndo chujni ko ti nduaxin me e ti x̄in ixi ndo Jesucristo.

¹⁸ Xro an ngisen bikon ndo Dio. Je o chjen en ndo, xjan naakuaxon, xjan jiníi Ndotée ko je e xjan juinchenoına xjan xranchi jii Ndo Dio.

*Ndo Juan nichja ndo kondee ndo Jesús
(Mt. 3:11-12; Mr. 1:7-8; Lc. 3:15-17)*

¹⁹ Kaxin ni judío, ni tjajna Jerusalén, xruan an na xitaana ko xi tjako ley ngajin ndo Juan ixi tsjanchangí e na ndo:

—¿Ngisen ja a?

²⁰ Ko je e ndo ndako juatingíexin ndo:

—Je a ndo Cristo najan an.

²¹ Tjume e íjngo juanchangi e xa ndo:

—¿Ngisen ja a tjume e? ¿Á ndo kuachronga chijnie ndo Dio ó sa ó, ndo Elías?

Ko ndo Juan ndachro ndo:

—Je a je e ndo jan an.

Tjume e juanchangi e xa ndo:

—¿Á ja a ndo xrochronga chijnie ndo Dio, ndo xrokuii?

Ko juatingíexin ndo:

—Na i.

²² Méxin, ndache xa ndo:

—¿Ngisen ja a tjume e? Xrokonda tsiki anna chijni ngajin ngisen xruan anna. ¿Nge e chao xron-dachrua ngisen ja a?

²³ Juatengíexin ndo Juan:

—Jan an naa ngisen nichja séen jii ntajie ndachro: “Tantje enta naa cha o nao itji ixi Ncháina tsii” —ti ndachro ndo Juan me e tsindachro ndo profeta Isaías.

²⁴ Ko chujni tsikjin tsijao ndo Juan, xi fariseo tsixrua an chujni

²⁵ ko juanchangi e na ndo:

—Siá je a ja a ndo Cristo, ko je a ndo profeta Elías, ko kaxon je a ndo profeta stechón en na, ¿sonda tikitée na tjume e?

²⁶ Ndo Juan ndache ndo na:

—Jan an tikitéexin na inda, ko ngakjen en ja anta jii naa ngisen chuxin anta.

²⁷ Tuenxin najan an jitii ndo ko ícha tetuan an ndo ixi jan an. Ko tikinixin a tsoxindanga a tjuée katée ndo.

²⁸ Kain ji i kon en tjanya Betábara ndatsjonxin ti indajitinga ndatin in Jordán ti no jii ndo Juan jitikitée ndo chujni.

Ndo Jesús xranchi naa kutuchjon ne e ndo Dio

²⁹ Ndúyaxin ndo Juan bikon ndo ndo Jesús jitonchjiñe e ndo tjenka ndo ko ndachro ndo:

—Tsje enta nti i jitii ndo xranchi naa Kutuchjoen ndo Dio, ndo tantsje jíee ni nunte xasintajni.

³⁰ Nchakon ndachrjan jitii naa ngisen tuenxin najan an, ngisen ícha tetuan an xixi ó sa ó jii je e ndo, me e nichja xixi je e ndo.

³¹ Jan an kaxon kuichuxin a ndo. Ko jan an bakikitéexin na xixi inda xixi jaña ni tjanya Israel xrokuichuxin na ndo.

³² Kaxon ndachro ndo Juan:

—Jan an bikon Espíritue ndo Dio xingajinxin ngajni xranchi naa kuntuá ko bake e ngata a ndo.

³³ Ko xranóna i ngisen je e ndo. Ko ngisen xruan anna tsikitée chujni xixi inda, ndo me e ndachijina ndo: “Nchakon tsikuan Espíritue ndo Dio xroxingajinxin ngajni ko tsii ngata a naa ngisen, ndo me e tsikitée ndo na xixi Espíritue ndo Dio.”

³⁴ Jan an ó bikon ndo ko chrja nga xixi je e ndo Chjen en ndo Dio.

Ndo Jesús kuinche e ndo sen bajikao ndo

³⁵ Ndúyaxin ndo Juan jii ndo nti a íjngo ko kao yuu sen chrjikao ndo,

³⁶ ko hora bikon ndo Juan kuatsinga ndo Jesús, ndachro ndo:

—Tsje enta, je e ndo Kutuchjoen ndo Dio.

³⁷ Kayui sen rué e ndo Juan kuin en sen nge e ndachro ndo ko rué e sen ndo Jesús.

³⁸ Méxin, ndo Jesús ngatjia ndo tsje e ndo ko bikon ndo jirué e sen ndo ko ndachro ndo:

—¿Nge e tjéenta?

Je e sen ndachro sen:

—Maestro, ¿no jii ndúya?

³⁹ Ko juatingíexin ndo Jesús:

—Xrokuinta tsje enta.

Méxin, ikjui sen ko bikon sen ti no bakitu e ndo ko kuatsinga sen nguixin nchakon me e ngajin ndo ixi ó kóndo xranchi las cuatro.

⁴⁰ Naa sen yuu tsikin en nge e ndachro ndo Juan ko tsirue e ndo Jesús, ndo me e ndatin in Andrés, ndo kichuu ndo Simón Pedro.

⁴¹ Ndo Andrés tuinxin ikjui ndo bijée ndo ndo kichuu ndo, ndo Simón, ko ndachro ndo:

—Kuitjána ndo Mesías. Mesías xrondachro Cristo.

⁴² Tjume e ndo Andrés bikao ndo ndo Simón ti no jii ndo Jesús. Ko hora bikon ndo Jesús sen, ndachro ndo:

—Ja a Simón, chjen en ndo Jonás. Ko jai ndatsi ian Cefas. Ko Cefas xrondachro Pedro.

Ndo Jesús tiye e ndo ndo Felipe ko ndo Natanael

⁴³ Ndúyaxin ndo Jesús tjaun ndo xrokjui ndo nunte Galilea ko kuetan ndo ndo Felipe, ko ndache ndo ndo:

—Ruanana.

⁴⁴ Ko ndo Felipe, ndo tjajna Betsaida, nti a kaxon tjajnéé ndo Andrés ko ndo Pedro.

⁴⁵ Ko ndo Felipe ikjui ndo bijée ndo ndo Natanael ko ndachro ndo:

—Ó bikona ndo xrokuij xranchi tsikjin ndo Moisés ti xroon ley ko kaxon ngisen tsikjin sen profeta. Ji i ndo Jesús, chjen en ndo José, ndo tjajna Nazaret.

⁴⁶ Ndachro ndo Natanael:

—¿Á ko chao xrokuachrje naa nge e jian tjajna Nazaret?

Juatengíexin ndo Felipe:

—Xrokuia tsje é.

⁴⁷ Ko hora bikon ndo Jesús jitonchjiñe e ndo Natanael, ndachro ndo:

—Nti i jitij naa ndo nduaxin israelita ko xro an juancheya jii ngajin ndo.

⁴⁸ Méxin, juanchangi ndo Natanael ngajin ndo Jesús:

—¿Xranchi chuxianna?

Ko ndachro ndo Jesús:

—Jan an bikuan ti xratiya ia ndo Felipe hora bake e chringi ntáa tajon tuhigo.

⁴⁹ Méxin, ndachro ndo Natanael:

—Maestro, ja a Chjen en ndo Dio, ndo Rey tetuan an tjajna Israel.

⁵⁰ Juatengíexin ndo Jesús:

—¿Á kuitikaonna ixi je o ntatjua bikuan chringi ntáa tajon tuhigo? Tjume e tsikuan ícha ijié nge e ixi ti nge e bikuan jai.

⁵¹ Kaxon ndachro ndo Jesús:

—Nduaxin ntatjunta ixi tsikonnta xroxitje e ngajní ko sen angéel ndo Dio stetajin in sen ko stexinganjin sen ngata a Chjen en ndo Dio, xjan jongí e xranchi chujni.

2

Tjajna Caná nunte Galilea kute e na

¹ Nii nchakon tjume e bake e naa kia kute e na tjajna Caná nunte Galilea. Janée ndo Jesús jii jan nti a.

² Ni bake e kia nichje e na ndo Jesús ko sen teyuu chrikao ndo xrokuji sen kia me e kaxon.

³ Tjume e tsikanga xranvino ko janée ndo Jesús ndache jan ndo:

—Í chóna i na xranvino.

⁴ Ko juatingíexin ndo Jesús:

—Nchri, ¿sonda ndachijiana me e? Xratiji a nchakon sinta a naa ixra ijié.*

⁵ Ko je e jan ndache jan ni stetonchjeya nge e:

—Nche enta kain nge e xrontatjunta ndo.

⁶ Ko nti a jii ikjaon ichi tsikoña ixro, jitjiá inda, me e tunde e ni judío nchakon tijma na, nchakon tantsje na jíee na. Ko ngujngu ichi me e titja tikia xranchi ochenta o ciento litro inda.

⁷ Ndo Jesús ndache ndo sen jitonchjeya nge e:

—Nchechrénta inda ichi ji i.

Ko juinche chré na ichi inda.

⁸ Tjume e ndachro ndo Jesús:

—Tantsjenta nchíin inda ko tiku unta inda ngajin xi tetuan an kia.

Ko jaña juinche e na.

⁹ Ko xi tetuan an kia kui i xa nchíin inda ko ó tsikjan inda xranvino ko noe a xa no kujxin xran. Je o ni tochjeya nge e no e na ixi je e na tsikantsje na inda. Méxin, xi tetuan an kia kuiye e xa xi kute e.

* **2:4 naa ixra ijié** milagro

¹⁰ Ko ndache xa xi kute e:

—Kain na sa ó tajon na xran ícha jian ko hora ni kuij kia ó kui i na yee xran, me e tajonni xran ngixeko. Ko ja a tsikatsian xran jian hasta jai.

¹¹ Nge e tsijinche e ndo Jesús tjajna Caná nunte Galilea, ña sa ó nge e juinche e ndo ixi tsjako ndo juachaxien ndo, ko sen teyuu chrikao ndo kuitikaon sen ndo.

¹²*Ko kuatsinga ji i, ikjui ndo tjajna Capernaum, ko janée ndo ko xikichuu ndo ko sen teyuu chrikao ndo, ko nti a bake e sen kaxin nchakon.

Ndo Jesús nchetjúá ndo ni ngo ijíé

(Mt. 21:12-13; Mr. 11:15-18; Lc. 19:45-46)

¹³ Ó tsji nchakon kia Pascua ne e ni judío, ndo Jesús sakjui ndo tjajna Jerusalén.

¹⁴ Ko nti a ngaxin in ni ngo jíé kuitja ndo ni nchekji kuxinta, kutuchjon, kuntúá, ko ni ste nunte jitasingixin na tomie chujni.

¹⁵ Ko hora bikon ndo Jesús ji i, juinchéña ndo naa cuarta, ko bengixin ndo na nti a ko kao kutuchjoen na ko kuxinte e na. Ko kuintjí ndo ngata a nche tomie ni bakasingixin ko ndá a banka ndo mesé na.

¹⁶ Ko je e ndo ndache ndo ni nchekji kuntúá:

—¡Tantsjexinnta kain nge e nti i! Nchéña inta ndo a Ndotána xranchi naa ndasin.

¹⁷ Méxin, sen teyuu chrikao ndo xraxaon sen nge e ti ndachro xroon chijnie ndo Dio: “Tsango chjána juaña nge e ndako a ton en ngaxin in ndointa.”

¹⁸ Méxin ni judío juanchangi e na ndo:

—¿Nge e tjakoxian ixi chao sinche e kain ji i?

19 *Ko juatingíexin ndo Jesús:

—Tonchjejinta ni ngo ji i ko nínxin nchakon sintakonchjian ni ngo íjngo.

20 Ko ni judío ndache nã ndo:

—Yuukan ko ikjaon nano konchjianxin ni ngo ji i, ko, ¿á ja a nínxin nchakon sinchekonchjianxin ni ngo íjngo?

21 Ko ti ni ngo nichja ndo Jesús me e cuerpoe ndo.

22 Méxin, nchakon xechón ndo Jesús, sen teyuu chrikao ndo xraxaon sen ti nge e tsichronga ndo, ko kuitikaon sen xroen ndo Dio ko chijni tsindache ndo sen.

Ndo Jesús chúxin ndo nge e xraxaon kain chujni

23 Nchakon ndo Jesús bake e ndo tjanya Jerusalén kia Pascua, itsjé nã kuitikaon nã ndo nchakon bikon nã nge e jian juinche e ndo.

24 Ko ndo Jesús kuachúntia i ndo nã ixi chúxin ndo nge e xraxaon kain nã,

25 ko baxrokonde a ndo ixi naa chujni xrobeki e ndo nge e juinche e inaa chujni ixi je e ndo no e ndo nge e xraxaon nã ngaya aséen nã.

3

Ndo Jesús ko xi Nicodemo

1 Bake e naa xi Fariseo ndatin in xa Nicodemo, xi me e tetuen en xa ngajin ni judío.

2 Xi ji i kuji xa ngajin ndo Jesús naa tiie ko ndachro xa:

—Maestro, nónana ixi ndo Dio xruan an ndo ixi sinchekuannãna, ixi xro an ngisen xrojuinche e

nge e jian nche e ja a siá ndo Dio xrobake a ndo ngajian.

³ Ko ndo Jesús ndachro ndo:

—Jan an ntatjua ixi ngisen tjongíe a íjngo jua i tsikon sen ti tetuan an ndo Dio.

⁴ Juanchangi xi Nicodemo:

—¿Xranchi tsjongí e naa xi íjngo siá ó ntaxi xa? ¿Xranchi chao íjngo tsixin in xa tse e janée xa ko tsjongí e xa íjngo?

⁵ Ko ndo Jesús ndachro ndo:

—Nduaxin ntatjua: ixi ngisen tsjongíexin a inda ko Espíritue ndo Dio jua i tsixin in sen ti tetuan an ndo Dio.

⁶ Chujni tjongíexin ndotée ko janée xra je o chujni sen, ko sen tjongíexin Espíritue ndo Dio, sen me e tayé e sen Espíritue ndo.

⁷ Xronka ia ixi nge e ntatjua ixi xrokonda tsjongí e kain chujni íjngo.

⁸ Chrinto itji chrinto no tjaun chrinto. Ko ja a tin en xroin chrinto ko noa ia no itji chrinto ko no ti xín chrinto. Ko jaña sen tjongíexin Espíritue ndo Dio.

⁹ Ko je e xi Nicodemo juanchangi xa:

—¿Xranchi tson en ji i?

¹⁰ Ko ndo Jesús ndachro ndo:

—Ja a nchekuen én chujni Israel, ¿á tienxin a ti ntatjua?

¹¹ Jan an nduaxin ntatjua ti nónana nichjana ko ti bikona tekina, ko ja anta titikaon anta ti nge e ndachrjanna.

¹² Teki anta nge e tson en ngata a nunte nti i ko titikaon anta ko, ¿xranchi tsitikaonnta siá xrontatjunta nge e tson en ngajní?

¹³ Xro an ngisen kuajin in ngajní, je o Chjen en Ndo Dio, xjan jongí e xranchi Chujni, je e xjan bake e xjan ngajní ko kuixin xjan nti a.

¹⁴ Xranchi juinche e ndo Moisés nchakon bake e sen ntajie, nti a kuasintjian ndo naa kunchee chika ixi xrotsje e sen ba ko jaña tsen a sen; méxin, jaña tson en tsasintjian na Chjen en ndo Dio, xjan jongí e xranchi chujni,

¹⁵ ko jaña kain sen tsitikaon ndo Jesús tsen a aséen sen, tsechón sen kain nchakon.

¹⁶ 'Ndotáina Dio tsango tjue e ndo kain chujni jii ngata a nunte xasintajni,* méxin xruan an ndo chjen en ndo, xjan naakuaxon, ixi kain sen tsitikaon xjan tsitjáña i aséen sen ko je e sen tsechón sen kain nchakon.

¹⁷ Ko ndo Dio xruan i ndo chjen en ndo ngata a nunte xasintajni ixi tsjankata a xjan ijie ngajin na. Na i, je e xjan tsantsje xjan ijie chóna na ko jaña tsitjáña i na.

¹⁸ Ngisen tsitikaon chjen en ndo Dio tsjankata i ndo sen ijie. Ko ni tsitikaon a, ó juankata a ndo ijie ngajin na ixi kuitikaon a na chjen en ndo Dio, xjan naakuaxon.

¹⁹ Méxin, ni titikaon a ó juexin juankata a ndo na ijie, ixi kuii ngisen juinchengasáñe e chujni jii ngata a nunte xasintajni ko je e chujni juinche a juaxrxin ixi ícha rué e na ti naxixe e ixi ndako a nche e na.

²⁰ Kain ni ndako a nche e, ningakon en na xro i tingasáña ko tonchjiñe a na tjenka xro i ixi tjaun a na tsonoxin ti ndako a stenche e na.

* **3:16 xasintajni** mundo

21 Ko sen nche e jian tonchjiñe e sen tjenka xro i tingasáña ixi chao tsikon chujni kain nge e stenze e sen xranchi tjaun ndo Dio.

Ndo Juan chronga ndo íjngo kondee ndo Jesús

22 Tjume e ndo Jesús ko sen teyuu chrikao ndo sakjui sen nunte Judea. Nti a kuatsinga ndo kaxin nchakon bikitée ndo chujni.

23 Kaxon ndo Juan bake e ndo tjajna Enón tjenka tjajna Salim ko nti a bikitée ndo chujni ixi nti a jii yee inda. Ko chujni bakii na batikitée na.

24 *Jii kon en ti xratijé a na ndo Juan ndo achjiso.

25 Méxin, kaxin chujni, sen chrikao ndo Juan ko ni judío kuaxi nichja na xranchi xrotjúáxin chujni.

26 Ko sen chrikao ndo Juan kuintekji sen ngajin ndo ko chronga sen ngajin ndo:

—Maestro, ndo bake e ngajinnta tuenxin ndarío Jordán, ndo kondee bekinananta, jai kao ndo tikitée ndo chujni ko itsjé na rué e na ndo.

27 Ko ndachro ndo Juan:

—Xro an ngisen xrojuinche e naa ixra siá ndo Dio xrokuajon a ndo juachaxin.

28 *Ja anta kuin ennta nchakon ndachrjan ixi jan an je a ndo Cristo. Je o naa ngisen kuitao en ndo cha o ixi xrochrjanga tsii ndo.

29 Nchakon tute e chujni, xi tute e tsayé e xa janchri e xa. Ko tjume e sen chúxin xa take e sen juaxruxin ixi jitin en sen nge e jinichja xa. Ko kaxon jan an juaxruxin ritjén ixi kueya chujni jitonchjiñe e ngajin ndo Jesús.

³⁰ Je e ndo xrokonda ícha tsetuan an ndo ko jan an ína i.

Ngisen kuixin ngajní

³¹ 'Ndo kuixin ngajní tetuen en kain chujni. Ko chujni nunte xasintajni chronga nge e jii nunte xasintajni. Ko ndo kuixin ngajní tetuen en ndo kain nge e.

³² Je e ndo nichja ndo nge e tsikikon ndo ko nge e tsikin en ndo. Ko xro an chujni titikaon nã nge e ndachro ndo.

³³ Ko siá xrojan ngisen titikaon nge e ndachro ndo, jaña tjako sen íxi nduaxin nge e nichja ndo Dio,

³⁴ íxi ndo xruan an ndo Dio nichja ndo chijnie ndo Dio, íxi je e ndo kuayé e ndo kain juachaxien Espíritue ndo Dio.

³⁵ *Ndotáina Dio tjue e ndo Chjen en ndo, ko jaña tsikajon ndo kain juachaxin íxi tsetuen en xjan kain nge e.

³⁶ Ngisen tsitikaon Chjen en ndo Dio xrochónda sen juachaxin tsechón sen kain nchakon. Ko ngisen tjaun a tsitikaon Chjen en ndo xrochónda i sen juachaxin me e, íxi ndo Dio tsajon ndo juachaxin tangi tson en sen.

4

Ndo Jesús juao ndo naa nchri samaritana

¹ Tjume e ni fariseo kono e nã íxi ícha itsjé chujni rué e ndo Jesús ko ícha itsjé chujni bikitée ndo íxi ndo Juan.

² Ko je a ndo Jesús tikitée ndo na. Sen chrikao ndo, sen me e bikitée chujni.

³ Hora kono e ndo Jesús ixi jaña tsikin en ni fariseo, kuachrjexin ndo nunte Judea ko íjngo ikjan ndo nunte Galilea.

⁴ Ko hora kuachrjexin ndo nti a xrokonda tsatsinga ndo nunte Samaria.

⁵ Ko kuiji ndo naa tjajna Sicar nunte Samaria, tjenka nunte tsikajon ndo Jacob kuayé e chjen en ndo, ndo José.

⁶ Nti a jii naa pozo tjiá inda kuachóna ndo Jacob. Ko ndo Jesús kuiji ndo nti a ko tsango konchrje ndo ixi tsango ikjín tsikjixin ndo, méxin bake e ndo nunte tjenka pozo. Hora me e xranchi ngusine nchakon.

⁷ Ko tuinxin kuiji naa nchri tjajna Samaria, kuiji nchra ti pozo me e ixi tsantsje nchra inda. Ko ndo Jesús ndache ndo nchra:

—Chjánana nchíin inda tsi i.

⁸ Ko sen teyuu chrikao ndo satsikintekji sen tjajna tjenka nti a bike na sen nge e sinekao sen ndo.

⁹ Ko nchri samaritana juatingíexin nchra:

—¿Sonda ja a naa chujni judío tjanchianana inda ixi jan an naa nchri samaritanana?

(Jaña ichro nchra ixi ni judío tjento a na ni samaritano.)

¹⁰ Ko juatingíexin ndo Jesús:

—Siá xrokono a nge e tajon ndo Dio ko xrochuxian ngisen jitjanchia a inda, ja a xrojuanchanana inda ko jan an xrotjá a inda jichón.

¹¹ Ko je e nchra juate e nchra:

—Ja a chondai a nge e tsantsjexian inda ko pozo tsango yaso e pozo, ¿no xrochjánaxianna inda jichón?

¹² Ndo Jacob, ndo kuachrjenixinna, ndo me e kuitunana ndo pozo ji i, ko je e ndo baki i ndo inda ko chjen en ndo ko kain kuée ndo kaxon. ¿Á ja a, á ícha tjintee ixi je e ndo?

¹³ Ko juatingíexin ndo Jesús:

—Kain ni ti i inda ji i, íjngo tsen en na inda.

¹⁴ Ko sen tsi i inda tajon jan an, nai a tsinteken en sen inda. Ixi inda tajon jan an tsoña xranchi inda jitachrjexin ngaya aséen sen ko ji i tajon juachaxin tsechón sen kain nchakon.

¹⁵ Ko ndachro nchra:

—Chjánana inda me e, ixi tsen ana inda íjngo ko íxrokjan ina tsantsje inda nti i.

¹⁶ Ko ndachro ndo Jesús:

—Itjia tiye é ndoxi a ko tjume e tsji ia nti i íjngo.

¹⁷ Ko je e nchra ndachro nchra:

—Chonda i xixi na.

Méxin, ndachro ndo Jesús:

—Nduaxin ndachrúa ixi chonda ia xixi a.

¹⁸ Ixi kuachonda na ó xixi a, ko xi chonda jai je a xixi a. Nduaxin ndachrúa ixi chonda ia xixi a.

¹⁹ Ko kuin en nchra ji i ko ndachro nchra:

—Nóna ixi ja a naa ngisen chronga chijnie ndo Dio.

²⁰ Sen kuachrjenixinna, kuaxraxaonxin sen ndo Dio ijna nti i. Ko ja anta, ni judíonta ndachronta ixi xrokonda xroxraxaonxinna ndo Dio ni ngo ijié jii tjajna Jerusalén.

²¹ Ko ndo Jesús ndache ndo nchra:

—Titikáoanna ixi tsii nchakon xrokonda i xrox-raxaonxinnta Ndotáina Dio ijna nti i ko xrox-raxaonxin anta ndo tjajna Jerusalén.

²² Ja anta chujni samaritanonta noa inta ngisen xraxaonnta. Ko jan an naa chujni judío chuxinna ngisen xraxa onna. Méxin, ndo tantsje ije chóna chujni, ndo me e tsikachrjexin ndo ni judío.

²³ Ko jitiji nchakon ko jai nchakon me e, ixi sen nduaxin tjaun sen tsajon sen juasaya ngajin Ndotáina Dio, xrokonda ixi nchijí aséen sen xroxraxaonxin sen Ndo. Ko Ndo Dio tsake e ndo juaxruxin ixi jaña xroxraxaon sen ndo.

²⁴ Ndo Dio espíritu ndo, ko sen xraxaon ndo xrokonda xroxraxaonxin sen ndo ixi aséen sen.

²⁵ Ko ndachro nchra:

—Jan an nóna ixi tsii ndo Mesías, ndo Cristo. Ko nchakon tsii ndo sinchekuannana ndo kain nge e.

²⁶ Ko juatingíexin ndo Jesús:

—Ndo me e najan an, ndo ritjáoa jai.

²⁷ Xrastetjao sen ja in, sen teyuu chrikao ndo kuiji sen, ko xronka sen ixi bikon sen jinichje e ndo naa nchri, ko xro an ngisen juanchangi e ndo nge e tjaun nchra, o sonda jinichje e ndo nchra.

²⁸ Tjume e je e nchra bake e nchra nchixran nunte ko sakjui nchra tjajna beki e nchra kain chujni:

²⁹ —Ichjina, tsikonnta naa ndo chronga kain nge e junta a. ¿Á je a ndo Cristo ndo me e?

³⁰ Tjume e chujni kuachrjexin na tjajna kuitsje e na ndo Jesús.

³¹ Xratiji a na, sen teyuu chrikao ndo tinóatée sen ngajin ndo, ndachro sen:

—Maestro, inte nge e.

³² Ko ndachro ndo:

—Jan an chónda nge e iné ko ja anta chuxin anta me e.

³³ Ko sen teyuu chrikao ndo kuaxi sen juanchangi e kichuu sen:

—¿Á xrojan chujni biken en ndo nge e juine ndo?

³⁴ Ko ndachro ndo Jesús:

—Ti iné jan an me e ixra sinta a ti tsiketuan an ngisen xruan anna, ko xrokonda sintajexin ixra.

³⁵ Ja anta ndachronta: “Xratitjáña noó nchanitjao tsandáanta noatrigo.” Ko jan an ntatjunta: Tsje enta no tsikinga ixi ó kuicha noa ko ó chao tsandáani.

³⁶ Sen tandáa, xenge e sen na. Ko nge e tandáa sen me e chujni, ko chujni me e tsehón kain nchakon. Ko sen tenga ko sen tandáa xre ó juaxruxin take e sen.

³⁷ Ko nduaxin nge e ndachro sen: “Naa sen tenga, ko inaa sen tsandáa.”

³⁸ Méxin, jan an xruan annta ixi tsandáanta naa nunte tsikenga inta. Inaa sen tsijinche e ixra ko ja anta tsjachanta tsasiinnta nge e bengas sen.

³⁹ Ko itsjé ni tjajna samaritano ni ikjui nchra kuindache nchra, kuitikaon na ndo Jesús ixi chronga nchra: “Ndo ji i chronga ndo kain nge e juinta a sa ó.”

⁴⁰ Ko hora kuin en na nge e juinche e ndo, kujj na ngajin ndo ko kuinóatée na ngajin ndo ixi tsitu e ndo nti a ngajin na. Ko nti a kuitu e ndo yuu nchakon.

⁴¹ Ko ícha kueya na kuitikaon na ndo ixi kuin en na nge e nichja ndo.

⁴² Ko ndache n̄a nchra:

—Jai titika onna, ko ixi je a je o nge e ndachijiana. Kaxon ixi jai jan anna kuitikaonna ixi kuin anna nge e nichja ndo ko nónana ixi je e ndo nduaxin ndo Cristo ndo, ndo sinchemé e jíee kain chujni.

Ndo Jesús ko chjen en xi nche e ixra gobierno

⁴³ Yuu nchakon tjume e, ndo Jesús kuachrjexin ndo nunte Samaria ko sakjui ndo no nunte Galilea.

⁴⁴ *Xranchi tsindachro ndo Jesús, ninaa ndo chronga chijnie ndo Dio, ni tjajnée ndo xrochónde e n̄a ndo juasaya.

⁴⁵ *Nchakon kuiji ndo nunte Galilea, ni nti a kuayé e n̄a ndo ko kuajon n̄a juasaya ngajin ndo ixi kaxon tsikjin n̄a kia Pascua tjajna Jerusalén, ko bikon n̄a nge e juinche e ndo kia nti a.

⁴⁶ *Tjume e ikjan ndo Jesús tjajna Caná nunte Galilea, ti no tsijinchekjan ndo inda ixran vino. Nti a bake e naa xi tituan an xrée gobierno. Ko kuachónda xi naa chjan ni e tjajna Capernaum.

⁴⁷ Ko hora tsikin en xa tsikixin ndo Jesús nunte Judea ko kuiji ndo nunte Galilea, rué e xa ndo ko kuinóatée xa ngajin ndo ixi itsji ndo ndo a xa ko sinchexrjuen en ndo chjen en xa, ixi ó jite en xjan.

⁴⁸ Ko ndachro ndo Jesús:

—Ja anta, titikaon anta siá tsikon anta naa nge e jian sinta a.

⁴⁹ Ko kuinóatée xi nche e xrée gobierno ko ndachro xa:

—Taka ichjina ixi chjan na ó jite en xjan.

⁵⁰ Ko juate e ndo Jesús:

—Ikjan ndúya ixi chjan an chao jii xjan jai.

Ko xi me e kuitikaon xa nge e ti ndachro ndo Jesús, ko sakjui xa.

⁵¹ Ko ikjan xa ndo a xa, ni nche e xrée xa kuachrje n̄a biketan n̄a xa ngatja cha o, ko ndache n̄a xa:

—Chajan an ó jian jii chán.

⁵² Ko juanchangi e xa n̄a ngixe e hora kuaxi koxruen en chán. Ko chronga n̄a:

—Jnajna xranchi hora naa kóndo kuachrje e chán súa.

⁵³ Ko jaña kono e ndotée chán ixi hora ña tsindachro ndo Jesús ixi chjen en xa ó jian jii chán. Ko je e xa ko kain ni ndo a xa kuitikaon n̄a ndo Jesús.

⁵⁴ Ji i yuxin nge e jian juinche e ndo Jesús nchakon kuixin ndo nunte Judea, ikjan ndo nunte Galilea.

5

Ndo Jesús juinchexruen en ndo naa xi

¹ Tjume e ni judío bake e n̄a naa kia ko ndo Jesús ikjan ndo tjajna Jerusalén íjngo.

² Nti a tjenka ntachja ndatin in Ntachje e Kutuchjon jii naa pila inda ngigua hebreo ndatin in Betesda. Ko ngande e pila me e jii na ó tjatu o nchínchín tsiki te n̄a.

³ Nti a stetsinga kueya ni ni e, ni tikon a, ni jua i itji ko ni jua i nchetengi tutée. Stechón en n̄a tsontengi inda

⁴ ixi je a nanaunka xingajin naa ndo ángel tjenka pila me e ko nchetengi ndo inda. Ko ni sa ó tiji nti a

ko tjingi na inda toxruenxin na ixi ngixe i ichin bachóna na.

⁵ Nti a jii naa xi ni e, ó ní ite ko ijiní nano ni e xa.

⁶ Ko hora bikon ndo Jesús jitsinga xa, kono e ndo ixi ó sée ni e xa, ko juanchangi e ndo xa:

—¿Á tjauan tsoxruan an?

⁷ Ko xi ni e juatingíexin xa:

—Chonda i ngisen tsingijnana tsjingi inda hora tontengi inda. Ko hora tja on tsjingi nda, inaa ngisen ícha taka tjingi nda.

⁸ Ko ndachro ndo Jesús:

—Tingatjen, tatsían kania a, ko tajia.

⁹ Ko tuinxin koxruen en xa, ko juatsi in xa kanie e xa ko chao ikjui xa. Ko me e kon en nchakon tjoké e ni judío.

¹⁰ Tjume e ni judío ndache na xi koxruen en:

—Jai nchakon tjoké eni ko xro an juachaxin jii tsama kania a.

¹¹ Ko ndachro xa:

—Xi juinchexruanna ndachijina xa tatsían kania a ko tajia.

¹² Ko juanchangi e na xa:

—¿Ngisen kuetuan an tsatsian kania a ko ndachro tsajia?

¹³ Ko xi tsikoxruen en noe a xa ngisen juinchexruen en xa ixi nti a jii kueya na, ko ndo Jesús íkonoxin a ndo chriken en na nti a.

¹⁴ Tjume e ndo Jesús kuetan ndo xa ngaxin in ni ngo ijié ko ndache ndo xa:

—Tsje é jai ó koxruan an ko ínche a ti ndako a, ba ícha tangi tson an.

¹⁵ Tjume e sakjui xa, ko ndache xa ni judío ixi ndo Jesús juinchexruen en ndo xa.

¹⁶ Méxin ni judío kuaxi n̄a rué e n̄a ndo Jesús ko tjaun n̄a tsóña n̄a ndo ixi kuanche e ndo kain ji i nchakon tjoké e n̄a.

¹⁷ Ko ndo Jesús ndache ndo n̄a:

—Ndotána kain nchakon nche e ndo ixra, ko jan an kaxon jaña nta a ixra.

¹⁸ Méxin, jaña ni judío ícha tjaun n̄a tsóña n̄a ndo Jesús ixi titikaon a ndo nchakon tjoké e n̄a ko ixi kaxon ndachro ndo ixi je e ndo ko ndo Dio naxraje o sen, ko ndachro ndo ndotée ndo, ndo Dio.

Juachaxin chóna Chjen en ndo Dio

¹⁹ Tjume e ndo Jesús ndache ndo n̄a:

—Naa nge e nduaxin ntatjunta ixi Chjen en ndo Dio jua i sinche e ndo naa nge e je o je e ndo. Je o nche e ndo nge e tikon ndo nche e Ndotée ndo. Kain nge e nche e ndotée ndo kao chjen en ndo nche e xjan jaña.

²⁰ Ko Ndotána tjue e ndo Chjen en ndo, ko tjako e ndo chjen en ndo kain nge e nche e ndo, ko xratsjako ndo nge e ícha ijié ko ja anta xroxronkanta ixi tsikonnta me e.

²¹ Xranchi Ndotána nchexechón ndo ni tsiken en ko tajon ndo juachaxin tsechón n̄a íjngo. Jaña kaxon Chjen en ndo chao tsajon xjan juachaxin tsechón kain ni tjaun je e xjan.

²² Ko Ndotána xruan an ngisen tjankata a ndo ijie ixi kuajon ndo juachaxin ngajin chjen en ndo,

²³ ixi kain n̄a tsajon n̄a juasaya ngajin chjen en ndo xranchi juasaya tayé e Ndotána. Ngisen tajon a juasaya ngajin chjen en ndo kaxon tajon a sen juasaya ngajin Ndotée ndo, ndo xruan an ndo Cristo.

²⁴ 'Nduaxin nge e ntatjunta: Ngisen tin en nge e ntatjunta ko titikaon Ndo xruan anna, chóna sen juachaxin tsechón sen kain nchakon ko tangi a tson en sen, ixi ó kuatsinga ti tsen en sen ko jai tsechón sen kain nchakon.

²⁵ Nduaxin ntatjunta ixi ó tsij hora, ko jai hora me e, ni tsiken en tsin en na xronichja Chjen en ndo Dio. Ko sen tsitikaon ndo tsechón sen.

²⁶ Ixi Ndotána chao tsajon ndo juachaxin tsechón na ko kaxon tsikajon ndo juachaxin ngajin Chjen en ndo sinche e xjan jaña,

²⁷ ko kaxon tsikajon ndo juachaxin ngajin Chjen en ndo sinchéña xjan ijie ixi je e xjan Chjen en ndo Dio, xjan jongí e xranchi chujni.

²⁸ Xrakon anta ixi ti nge e ntatjunta. Ixi tsiji hora ti kain ni tsiken en, tsin en na xronichja xjan.

²⁹ Ko tsachrjexin na ti no stexrabaa na. Ko ni ndako juinche e, xroxechón na ixi tsechón na kain nchakon. Ko ni ndako a juinche e xroxechón na ko tangi tsikaon na ti tsoñe e na ijie.

Juachaxin chóna ndo Jesús

³⁰ 'Jan an jua i sinta a naa nge e jan on. Jan an ntáña ijie xranchi tituanna. Ko ijie ntáña, ndako ntáña ijie ko nta i nge e tja on jan an. Na i. Nta a nge e tjaun Ndotána, ndo xruan anna.

³¹ Ko siá jan on nichjaxin ixi najan an, ti ndachrjan tjinte a.

³² Ko jii inaa ngisen nichjaxinna ko nge e ndachro sen me e ixi najan an, tjintee.

³³ *Ja anta xruan annta ngisen ikjui juanchangi e ndo Juan, ko nge e juatingíexin ndo

ixi najan an, nduaxin me e.

³⁴ Ko jan an chuntia i nge e xrondachro xrojan ngisen ixi jan an. Ko je o ndachrjan ji i ixi ja anta xrochondanta juachaxin tsechonnta kain nchakon.

³⁵ Ndo Juan bake e ndo xranchi naa xro i jiche ko tingasaña, ko ja anta juaxruxin bake enta ixi xro i me e, maski tsjé a nchakon.

³⁶ 'Ko jan an chóna naa nge e ícha tjintee tjakoxin ixi najan an, ixi nge e tsindachro ndo Juan. Ixra nta a jan an, ixra naxre o tituanna Ndotána sinta a, ña tjakoxin ixi nduaxin Ndotána tsixruan anna ndo.

³⁷ *Kaxon Ndotána, ndo xruan anna, tjakoxin ndo ixi najan an. Ko ja anta nai a kuin ennta nichja ndo ko nai a bikonta ndo.

³⁸ Ko chijnie ndo xra je a jii ngaya asáanta ixi ja anta xratsitikaon anta ngisen Ndotána, ndo tsixruan anna.

³⁹ Ja anta jian nchekuanxinnta xroon chijnie ndo Dio ixi chon énta tsaye enta juachaxin tsechonnta kain nchakon. Ko xroon me e nichja ixi najan an.

⁴⁰ Ko ja anta tjaun anta tonchjiñe enta tjenkana ixi tsaye enta juachaxin me e.

⁴¹ 'Jan an tayé a juasaya tajon chujni.

⁴² Ko jan an chuxinnta ko nóna ixi tjaun anta ndo Dio.

⁴³ Jan an jui i ixi Ndotána xruan anna ndo ko ja anta titikaon antana. Ko siá tji naa ngisen je o nichja nge e chóna ngaya aséen na, ni me e titikaonnta.

⁴⁴ ¿Xranchi tsitikaonnta, siá tsaye enta juasaya tajon chujni, ko tjé anta ti nge e jian ti x̄in ngajin ndo Dio, ndo naáko Dio?

⁴⁵ Xraxaon anta ixi jan an tsjankata anta ijié ngajinxin Ndotána. Na i. Ndo tsjankata anta ijié me e ndo Moisés ixi chuntianta ngajin ndo.

⁴⁶ Ixi siá xrokuitikaonnta nge e tsindachro ndo Moisés, kaxon xrokuitikaonnta ixi ndo Moisés ikjin ndo ixi najan an.

⁴⁷ Ko siá tsitikaon anta nge e tsikjin ndo, ¿xranchi tsitikaonnta nge e ntatjunta?

6

Ndo Jesús kuajon ndo nge e juine na ó mil chujni (Mt. 14:13-21; Mr. 6:30-44; Lc. 9:10-17)

¹ Tjume e sakjui ndo Jesús kuantu ndo ndachaon Galilea, inda me e ndatin in Tiberias kaxon.

² Ko kueya chujni rué e n̄a ixi bikon n̄a ixr̄a ijié juinche e ndo ti juinchexruen en ndo ni ni e.

³ Ko ndo Jesús kuajin in ndo naa ijn̄a ko nti a bake e ndo nunte kao sen teyuu chrikao ndo.

⁴ Ko ó jitonchjiñe e nchakon ts̄ii kia pascua, kiée ni judío.

⁵ Ko bikon ndo Jesús ixi kueya chujni kuajin in n̄a jn̄a, jirué e n̄a ndo ko juanchangi e ndo ndo Felipe:

—¿No tse nana nge e sine kain chujni?

⁶ Jaña ndachro ndo ixi tsin en ndo nge e xichro ndo Felipe ixi ndo Jesús ó no e ndo nge e sinche e ndo.

⁷ Ko juate e ndo Felipe, ndachro ndo:

—Maski doscientos tomi xrochondana xrokue-naxinna nutja xraxrokuitja i xrojuine ngujngu chujni tu o nutja.

⁸ Ko ndo Andrés, naa sen chrikao ndo Jesús, ndosaué ndo Simón Pedro, ndachro ndo:

⁹ —Nti i jii naa chjan chón^{da} xjan na ó nutja tsikoña noa cebada ko chón^{da} xjan yuu kuchee. ¿Á tsitja ji i, ixi kueya chujni jii?

¹⁰ Ko ndachro ndo Jesús:

—Tetuen enta n̄ tsake e n̄ nunte.

Ti jii kayua nti a, bake e n̄ nunte, xranchi na ó mil chujni xi.

¹¹ Ko ndo Jesús kua ndo nutja ko kuajon ndo juasie ndo ngajin ndo Dio, ko tjume e kuajon ndo nio ngajin sen teyuu chrikao ndo. Ko je e sen konchjeya sen nio, kuayé e kain ni ste nti a. Jaña kaxon konchjeya sen kuchee. Ko kain n̄ juine n̄ kain ti tjaun n̄.

¹² Juexin juine n̄, tjume e kuetuen en ndo Jesús sen teyuu chrikao ndo, ndachro ndo:

—Tja onta nge e tsixe e ixi xro an nge e tsitjáña.

¹³ Ko jaña juinche e sen ko juinchekaon sen teyuu ntaxra nutja tutu o ti na ó nutja tsikoña noa cebada tsijinchexe e n̄ hora juexin juine n̄.

¹⁴ Ko ni juine nutja bikon n̄ ti ixr̄a ijié juinche e ndo Jesús ko ndachro n̄:

—Ndo me e nduaxin ndo tsixr^{ua} an ndo Dio tsii nunte xasintajni.

¹⁵ Ko ndo Jesús kono e ndo ixi tjaun n̄ xraxro-bikao n̄ ndo xrojuinchéña n̄ ndo rey ixi xrokue-tuan an ndo. Ko je e ndo tjaun a ndo jí i ko je o ndo sakjui ndo ntajie íjngo, ko nti a bake e ndo.

Ndo Jesús itji ndo ngataon inda

(Mt. 14:22-27; Mr. 6:45-52)

¹⁶ Tjume e ó kóndo sen teyuu chrikao ndo Jesús xingajinxin sen ijna sakjui sen ngande e inda,

¹⁷ ko kuajin in sen naa ntabarco ko kuaxi sen kuantu sen inda satsji sen tjajna Capernaum. Ó naxixe e ko xrakjan i ndo Jesús.

¹⁸ Tjume e kuaxi kuji chrinto soji ko kuaxi jamangitaon inda.

¹⁹ Ko chao sakjui sen xranchi na ó o ikjaon kilómetro ko tuinxin bikon sen ndo Jesús, jitonchjiñe e ndo tjenka ntabarco, xranchi yaa ndo cha o jitji ndo ngataon inda. Jaña bikon sen ko tsango xronka sen.

²⁰ Ko ndo Jesús ndachro ndo:

—Jan an jui i. Xronka inta.

²¹ Ko tsango juaxruxin kuintee sen ixi kuajin in ndo ntabarco. Ko tuinxin kuiji sen ti no xrokuiji sen.

Chujni tjé na ndo Jesús

²² Ko nchakon ndúyaxin, ni kuitu e ti ndachaon* kono e na ixi naakuaxon ntabarco bake e nti a, ko no e na ixi ndo Jesús tsikikao a sen ndo ixi bikon na ixi je o sen teyuu chrikao ndo, satsikji sen.

²³ Ko tjume e kuji kaxin ntabarco ti xin tjajna Tiberias tjenka ti no juinexin na nutja, ti kuajonxin ndo Jesús juasie ndo ngajin ndo Dio.

²⁴ Ko nchakon bikon na ixi ko a ndo Jesús ko kaxon ko a sen teyuu chrikao ndo, tjume e je e na kuajin in na ntabarco ko sakjui na tjajna Capernaum ko bijée na ndo Jesús.

* 6:22 *ndachaon* mar

Ncháina Jesús, je e ndo xranchi nutja tajon juachaxin stechón chujni

²⁵ Tjume e kuiji nã tuenxin inda ko bikon nã ndo Jesús ko juanchangi e nã ndo:

—Maestro, ¿ngisa jui ia nti i?

²⁶ Ko juate e ndo Jesús, ndachro ndo:

—Ó nóna ixi ja anta tjéenta nã ixi juintenta nutja ko kaonnta, ko je a ixi kuienxinnta ti ixrã ijie juinta a.

²⁷ Ta inta juachjaon ixi nge e sintenta taka tsjexin. Nche enta ixrã ixi nge e ti sintenta tsjexin a ixi tsaye enta juachaxin tsechonnta kain nchakon. Me e tajon Chjen en ndo Dio, xjan jongí e xranchi chujni, ixi Ndotée ndo tjako ndo ixi Chjen en ndo chónða xjan juachaxin.

²⁸ Ko juanchangi e nã ndo:

—¿Xranchi sinta ana ixi tsitika onna xranchi tjaun ndo Dio?

²⁹ Ko juate e ndo Jesús, ndachro ndo:

—Ndo Dio tjaun ndo ixi tsitikaonnta ngisen tsixrua an ndo.

³⁰ Ko juanchangi e nã ndo:

—¿Nge e tjakoxian ixi tsikonna ko chao tsitika onna? ¿Nge e ixrã nche e?

³¹ Sen tsikachrjenixinna sa ó juine sen maná ikjan nutja nchakon bake e sen ntajie, méxin, jaña chijnie ndo Dio tsikjin nã ndachro: “Kuajon ndo nge e juine nã, me e nutja kuixin ngajní.”

³² Ko juate e ndo Jesús, ndachro ndo:

—Naa nge e nduaxin ntatjunta, je a ndo Moisés kuajon maná ikjan nutja xingajinxin ngajní. Ndotána tajon ndo nutja nduaxin, nutja xingajinxin ngajní.

³³ Nutja tajon ndo Dio, me e ndo xingajinxin ngajní ko je e ndo chjée ndo chujni nunte xasintajni juachaxin tsechón n̄a kain nchakon.

³⁴ Ko ndachro n̄a:

—Ncháina, kain nchakon chjána n̄a nutja me e.

³⁵ Ko ndachro ndo Jesús:

—Jan an me e nutja tajon juachaxin tsechón chujni. Sen tonchjiñe e ngajin jan an ítsen a sen jinta, ko sen tsitikaonna, ítsen a sen inda.

³⁶ Ko xranchi ntatjunta sa ó, maski ó bikontana, xratitikaon anta.

³⁷ Ko kain chujni chjána Ndotána tsonchjiñe e n̄a ngajin. Ko kain ni tonchjiñe e ngajin, jan an tsengí a n̄a satsji n̄a.

³⁸ Jan an juixin ngajní ko je a nge e tja on sinta a. Jui i xixi sinta a ixra tjaun ndo tsixruan anna.

³⁹ Ko Ndotána tsixruan anna, me e tjaun ndo xixi xro an chujni chjána ndo tsitjáña, xixi tjaun ndo jan an sintaxechón kain n̄a nchakon tsjexixin.

⁴⁰ Ngisen tsixruan anna tjaun xixi kain ni tsikon jan an, Chjen en ndo Dio, ko tsitikaonna n̄a, ni me e tsayé e n̄a juachaxin tsechón n̄a kain nchakon. Tjume e jan an sintaxechón n̄a nchakon tsjexixin.

⁴¹ Ko ni judío juangíxin n̄a ndako a nichje e n̄a ndo Jesús xixi tsindachro ndo je e ndo nutja xingajinxin ngajní.

⁴² Ko ndachro n̄a:

—¿Á je a xi i xi Jesús, ndotée xa ndatin in José? Chuxinna ndotée ko janée xa. ¿Méxin, sonda ndachro xa xixi ngajní tsixingajinxin xa?

⁴³ Ko juate e ndo Jesús, ndachro ndo:

—Ínichjangi anta.

⁴⁴ Xro an chujni xrokonchjiñe e ti ritjén jan an siá xrokuajon a juachaxin Ndotána. Ko sen tonchjiñe e ti ritjén, jan an sintaxechón sen nchakon tsjexixin.

⁴⁵ Sen kuachronga chijnie ndo Dio ó sa ó tsikjin sen xroon ndachro: “Ndo Dio sinchekuen en ndo kain chujni.” Méxin kain sen tsikin en ti nichja Ndotána ko juinchekuen en ndo sen jitonchjiñe e sen ti ritjén jan an.

⁴⁶ 'Xro an chujni tsikikon Ndotána. Je o ngisen kuixin ti jii ndo Dio tsikikon ndo.

⁴⁷ Nduaxin nge e ndachrjan ixi sen titikaonna ó chónnda sen juachaxin tsechón sen kain nchakon.

⁴⁸ Jan an nutja tajon juachaxin tsechón chujni.

⁴⁹ Chujni kuachrjenixinnta sa ó juine nā maná ikjan nutja, nchakon bake e nā ntajie, ko maski juine nā tjume e kuen en nā ko kuitjáña nā.

⁵⁰ Ko ti nichja jan an me e nutja xingajinxin ngajní, ko sen sine nutja me e tsen a sen.

⁵¹ Jan an nutja jichón xingajinxin ngajní. Ko sen sine nutja, tsechón sen kain nchakon. Nutja tsajon jan an ntau na me e, ko jan an tsajon nutja me e ixi chujni nunte xasintajni xrochónnda sen juachaxin tsechón sen kain nchakon.

⁵² Ko ni judío koñao nā, tjao kichuu nā, ndachro nā:

—¿Xranchi xrokuajon xi i ntau e xa xrojuinena?

⁵³ Ko juate e ndo Jesús, ndachro ndo:

—Jan an ndachrjan ixi siá sine anta ntau e Chjen en ndo Dio, xjan jongí e xranchi chujni, ko siá tsi anta jnié xjan, xrochonda inta juachaxin tsechonnta kain nchakon.

⁵⁴ Ngisen sine ntau na ko tsi i jnina, sen me e xrochónda sen juachaxin tsechón sen kain nchakon ko jan an sintaxechón sen nchakon tsjexixin.

⁵⁵ Ixi ntau na nge e nduaxin sine chujni, ko jnina me e nduaxin tsi i chujni.

⁵⁶ Sen ine ntau na ko ti i jnina stenii sen jan an ko jan an riní je e sen.

⁵⁷ Ndotána tsixruan anna ndo jan an, ndo me e jichón ndo, ko jan an richónxin ixi je e ndo. Ko sen sine ntau na, sen me e tsechónxin sen ixi jan an.

⁵⁸ Méxin, rinichja ixi nutja xingajinxin ngajní, nutja me e je a xranchi maná juine ni tsikachrjenixinnta sa ó ixi je e na, maski juine na maná, kuen en na. Ko siá sintenta nutja xingajinxin ngajní, ja anta tsaye enta juachaxin tsechonnta kain nchakon.

⁵⁹ Kain ji i juinçekuen en ndo ni tsixra o ni ngo Israel tjajna Capernaum.

Nge e chronga ndo Jesús tajon juachaxin tsechón chujni kain nchakon

⁶⁰ Ko nchakon kuin en na nge e juinçekuen en ndo Jesús na, tjume e itsjé sen chrikao ndo ndachro sen:

—Tsango tangi nge e chronga ndo. ¿Ngisen xrokuitikaon ji i?

⁶¹ Ko kono e ndo Jesús ixi jaña ndachro sen kuienxin a sen nge e tsindachro ndo ko juanchangi e ndo sen:

—¿Á kaxon ja anta tjaun anta tsin ennta ji i?

⁶² ¿Xranchi xrokon en siá tsikonnta ixi Chjen en ndo Dio, xjan jongí e xranchi chujni, satsji xjan íjngo ti no tsiki xín xjan?

⁶³ Espíritue ndo Dio tajon juachaxin tsechón chujni kain nchakon, ko ntau e chujni xro an tjintee. Ko nge e ntatjunta me e kondee Espíritue ndo Dio ko chóna juachaxin tsechónxin chujni.

⁶⁴ Ko kaxinnta xratitikaon anta.

Jaña ichro ndo ixi xrangíxixín ó no e ndo ngisen tsitikaon a ndo ko no e ndo ngisen sinchekji ndo.

⁶⁵ Méxin, ndachro ndo:

—Jaña ntatjunta ixi xro an chujni tsonchjiñe e ti ritjén jan an siá Ndotána tsajon a ndo juachaxin.

⁶⁶ Ko juexin ji i, kueya sen bakajikao ndo Jesús tuinxin kuintu e sen ndo, rue a sen ndo.

⁶⁷ Tjume e juanchangi e ndo sen teyuu chrikao ndo, ndachro ndo:

—¿Á kaxon ja anta tjaunnta satsjinta?

⁶⁸ *Ko juate e ndo Simón Pedro:

—Ncháina, ¿ti no itsjina? Chijni nichja ja anta tajon juachaxin tsechónna kain nchakon[†]

⁶⁹ ko titika onna ko nónana ixi nduaxin ja anta ndo Cristo, Chjen en ndo Dio jichón.

⁷⁰ Ko juate e ndo Jesús, ndachro ndo:

—Jan an kuincha a kainnta teyuunta, ko naánta nti i xrokjannta naa chujni ña i.

⁷¹ Ti ndachro ndo Jesús xrondachro ixi xi Judas Iscariote, ndotée xa ndatin in Simón. Xi Judas naa teyuu sen kuinche e ndo, ko xi me e sinchekji xa ndo Jesús.

6:68 Mt. 16:16; Mr. 8:29; Lc. 9:20. † **6:68** *tsechónna kain nchakon* vida eterna

7

Sen kichuu ndo Jesús kuitikaon a sen ndo

¹ Tjume e ndo Jesús kuaji ndo nunte Galilea ixi jua i tsaji ndo nunte Judea ixi ni judío tjaun na naatsóñaxón na ndo.

² Ko ó kuii nchakon kia, kiée ni judío nchéña na kueya nchia nchínchín,

³ ko sen kichuu ndo Jesús ndache sen ndo:

—Titua ia nti i. Satjia nunte Judea ixi kaxon sen rua a nti a tsikon sen ixra ijié nche e.

⁴ Ixi siá naa chujni tjaun ixi chujni xrochuxin na sen, sen me e je a imao sinche e sen ixra. Méxin, siá nduaxin nche e ixra ijié, je a imao xrojuinche e me e. Tsikon kain chujni nunte xasintajni.

⁵ Jaña ndachro sen kichuu ndo Jesús ixi kaxon je e sen titikaon a sen ndo.

⁶ Ko juatingíexin ndo Jesús:

—Xratitjá i hora sinta a ixra ijié. Ko ja anta ngixe i hora chao sinche enta nge e.

⁷ Chujni nunte xasintajni jua i xroningakon annta na. Jan an tsango ningakonna na ixi jan an ntatjan na ixi je e na je a jian nge e nche e na.

⁸ Ja anta itjinta kia. Jan an tsji a ixi xratiji a orána.

⁹ Jaña ndachro ndo, ko kuitu e ndo nunte Galilea.

Ndo Jesús jii ndo kia

¹⁰ Ko juexin satsikji sen kichuu ndo Jesús, tjume e je e ndo kaxon ikjui ndo kia, ko konoxin a ndo ixi tjaun ndo xro an ngisen xrobikon ndo.

¹¹ Ko ni judío tjée na ndo ti kia ko ndachro na:

—¿No jii xi me e?

¹² Ko kueya ni ste nti a stetjao n̄a kondee ndo Jesús. Kaxin n̄a ndachro n̄a: “Jian xi ña”; ko ikaxin n̄a ndachro n̄a: “Je a jian xa ixi ncheye e xa chujni.”

¹³ Ko xro an ngisen nichja kondee ndo ícha, ixi xrakon en n̄a ni judío.

¹⁴ Tjume e ó ngusine kia kuixin in ndo Jesús ni ngo ijié ko juangíxin ndo juinchekuen en ndo n̄a.

¹⁵ Ko ni judío xronka n̄a, tsje e n̄a ndo, ko ndachro n̄a:

—¿Xranchi tsango no e xi ji i kain nge e ixi xro an ngisen juako e xa?

¹⁶ Ko juate e ndo Jesús, ndachro ndo:

—Nge e ntakuan an chujni je a nge e tja on, ti ntakuan an n̄a me e kondee ngisen tsixruan anna jui i.

¹⁷ Siá xrojannta tjaunnta tsitikaonnta nge e tjaun ndo Dio, me e tsono anta á nduaxin ixi ndo Dio tjako o á je o nge e xraxa on.

¹⁸ Ko ngisen nichja nge e tjaun, je o nichja n̄a ixi tjaun n̄a ixi ikaxin n̄a tsajon n̄a juasaya ngajin je e n̄a. Ko ngisen tjaun ixi ngisen tsixrua an n̄a tsayé e juasaya, ni me e tjako nge e nduaxin ko ncheya i n̄a.

¹⁹ ¿Á je a ndo Moisés tjáanta ndo ley chijnie ndo Dio? Ko ninaánta kuitikaonnta nge e tsikjin ndo. Méxin, ¿sonda tjaunnta tson intana?

²⁰ Ko je e n̄a juate e n̄a:

—Ja a chonda naa espíritue Xixron anxrée. ¿Ngisen tjaun tsóñaxion?

²¹ Ko ndachro ndo Jesús:

—Naáko nge e junta a nchakon tjoké e na ko xronkanta.

²² Ko ndo Moisés tsiketuan an ndo ixi chjan anta, xjan xi, tsaa xjan chji e, (ko je a ndo Moisés kuaxi ndo juinchekuen en ndo na ji i, sen tsikachrjenixinnta kuaxi sen juinche e sen). Jaña ja anta chje énta xjan chji e, maski nchakon tjoka anta.

²³ *Ja anta tjaunnta tsitikaonnta nge e tsiketuan an ndo Moisés, méxin, chje énta ichjan chji e xjan nchakon tjoka anta, ko, ¿sonda toñaonta ixi juntaxruan an naa chujni nchakon me e?

²⁴ Tjankata inta ijié ixi je o nge e tikonxinnta ikonnta. Sa ó xraxaonnta nge e jian tjaun ndo Dio.

Ndo Jesús nichja ndo kondee ti no kuixin ndo

²⁵ Tjume e kaxin ni tjajna Jerusalén kuaxi na juntejao kichuu na, ko juanchangi na:

—¿Á je a xi ji i tjée na tsóña na xa?

²⁶ Ko jai jinichja xa ngajinxin ikon kain na ko xro an ngisen ndachro nge e. ¿Á titikaon ni tituan an ixi xi ji i nduaxin ndo Cristo xa?

²⁷ Ko jaina noina no tsiki xin xa. Ko nchakon tsii ndo Cristo, xro an ngisen tsono e no tsj xin ndo.

²⁸ Ko ndo Jesús juinchekuen en ndo na ti ni ngo ko kuin en ndo jaña juao na, ko séen nichja ndo, ndachro ndo:

—Nduaxin chuxinntana, ko no anta no juixin. Ko je a jui i ixi jan an tja on. Jan an jui i ixi xruan anna ndo nduaxin nche e nge e, ko ja anta chuxin anta ndo.

²⁹ Jan an chuxin ndo ixi nti a juixin ti jii ndo, ko je e ndo xruan anna ndo.

³⁰ Tjume e tjaun nā xrotsé nā ndo, xroxraxin in nā ndo ndo achjiso, ko xro an ngisen itsé ndo ixi xrakuajon a ndo Dio juachaxin sinche e nā me e.

³¹ Ko kueya nā kuitikaon nā ndo ko ndachro nā:
—Hora tsij ndo Cristo, ¿á ícha ijié nge e sinche e ndo, ixi xi ji i?

Xroxraxin in nā ndo Jesús ndo achjiso

³² Tjume e ni fariseo kuin en nā nge e ndachro nā ixi ndo Jesús, ko je e nā ko xitaana tetuan an kuetuen en nā kaxin ni policía nche e ixra ni ngo xrotsé nā ndo Jesús xroxraxin in nā ndo achjiso.

³³ Méxin, ndachro ndo Jesús:

—Tsake e ngajinnta kaxin nchakon ko tjume e xrokjanna ngajin ngisen tsixruan anna.

³⁴ Ja anta tsjéentana ko tsinchii antana ixi jua i itsjinta ti no tsake e jan an.

³⁵ Ko ni judío juangíxin nā juanchangi e kichuu nā:

—¿No satsji xa ixi jua i tsitjana xa? ¿Á tsji xa ngajin ni judío stekjen en ngajin ni nichja ngigua griego ixi sinchekuen en xa nā nti a?

³⁶ ¿Nge e xrondachro ti ndachro xa ixi tsjéena xa ko tsitja ina xa ko jua i itsjina ti no tsake e xa?

Ndajitinga jichón

³⁷ Nchakon jitjexin kia, me e nchakon ijié, bingajen ndo Jesús, ko séen nichja ndo:

—Siá xrojan ngisen kuen en inda tonchjiñe enta ngajin jan an ko tin innta inda.

38 Xranchi ndachro xroon Chijnie ndo Dio, ngisen titikaonna, sen me e ngaya aséen sen tsinga naa ndajitinga jichón.

39 Jaña ndachro ndo Jesús ixi sen titikaon ndo tsayé e sen Espíritue ndo Dio. Ixi xrati a Espíritue ndo ko ndo Jesús xrasatji a ndo ngajní.

Je a xraje o xraxaon chujni

40 Ko kaxin n̄a, nchakon kuin en n̄a nge e ndachro ndo Jesús, ndachro n̄a:

—Á nduaxin xi ji i xi profeta xrokuji.

41 Ko ikaxin n̄a ndachro n̄a:

—Xi ji i ndo Cristo.

Ko ikaxin n̄a ndachro n̄a:

—¿Xranchi xrokuji x̄in nunte Galilea ndo Cristo?

42 Xroon tsikjin sen kuachronga chijnie ndo Dio sa ó ndachro ixi ndo Cristo tsachrjexin ndo ni kuachrjenixin ndo rey David ko ts̄i x̄in ndo tjajna Belén, tjajna bake e ndo David.

43 Méxin, kain n̄a je a naxraje o xraxaon n̄a ko chjeya n̄a kondeexin ndo Jesús.

44 Kaxin n̄a tjaun n̄a saxrobikao n̄a ndo ixi xrox-raxin in n̄a ndo ndo achjiso ko xro an ni juinche e nge e.

Ni tetuan an titikaon a n̄a ndo Jesús

45 Tjume e ni policía kondee ni ngo ikjan n̄a ti ste ni fariseo ko xitaana tituan an. Ko je e n̄a juanchangi e n̄a ni policía:

—¿Sonda biko inta xa?

46 Ko juate e ni policía:

—Xro an ngisen kuanichja xranchi nichja xi me e.

47 Ko ndache ni fariseo ni policía:

—¿Á kaxonnta kuintu enta juntaya anta xa?

⁴⁸ ¿Á xrojan n̄ tetuan an t̄ajn̄ina ō ni fariseo kuitikaon xa?

⁴⁹ Ni titikaon xa, ni me e ch̄úxin a n̄ ley ko je e n̄ tsikaon n̄.

⁵⁰ *Xi Nicodemo, xi kuitsje e ndo Jesús naa tiie ó sa ó, xi me e naa ni fariseo, ko ndache xa n̄.

⁵¹ —Ley tajon a juachaxin tsjankata ana naa chujni ij̄e ti xratien ani nge e nichja n̄ ko noe ani nge e ij̄e juinche e n̄.

⁵² Ko juate e n̄:

—¿Á kaxon ja a juixian nunte Galilea? Nchekuanxian xroon chijn̄ie ndo Dio ko tsono a ixi xro an ngisen kuachronga chijn̄ie ndo Dio tsiki x̄in nunte nti a.

⁵³ Ko ngujngu n̄ chjeya n̄ sakjui n̄ ndo a n̄.

8

¹ Ko ndo Jesús sakjui ndo ijn̄a Olivo.

Naa nchri ndako a juinche e

² Ndúyaxin kuj̄i ndo Jesús ni ngo ko chujni t̄ajna kuj̄i n̄ ngajin ndo ko bake e ndo nunte ko kuaxi ndo juincheken en ndo n̄.

³ Tjume e ni tjako ley ko ni fariseo bika o n̄ naa nchri tsikitjaxin n̄ nchra jijuakao nchra naa xi, ko xi me e je a xixi e nchra. Ko bake e n̄ nchra ngusine ni ste nti a.

⁴ Ko ndache n̄ ndo Jesús:

—Maestro, nchri ji i kuitjaxin n̄ nchra jijuakao nchra naa xi, ko xi me e je a xixi e nchra.

⁵ Ko xroon tsikjin ndo Moisés ndachro ixi kain nchri jaña sinche e tsóñaxin n̄ nchra ixro, ko ja a, ¿nge e ndachrua?

⁶ Jaña juanchangi e n̄ ndo ixi tjaun n̄ ndako a xrojuatingíexin ndo ixi xrokuitja n̄ nge e xrobankata a n̄ ndo ijie. Ko je e ndo Jesús kuisée ndo ko kuaxi ndo ikjin ndo ngata a inche ixi dedo itja ndo.

⁷ Ko je e n̄ ícha tjanchangí e n̄ ndo. Me e xendua ndo ko ndache ndo n̄:

—Ni xro an ijie chóna, ni me e sa ó tsjánka n̄ ixro ko tsóña n̄ nchra.

⁸ Ko íjngo kuisée ndo ko kuaxi ikjin ndo ngata a inche.

⁹ Ko je e n̄ kuin en n̄ nge e ndachro ndo ko xraxaon n̄ ixi je e n̄ chóna n̄ ijie kaxon. Méxin, kuaxi n̄ sakjui n̄, naa ko naa n̄, xrangíxixín ni ícha tachríi hasta ni ícha nchíin. Ko je e ndo Jesús ko nchri tsikika o n̄, yutu je o sen kuitu e sen.

¹⁰ Ko tjume e ndo Jesús xendua ndo ko juanchangi e ndo nchra:

—Ja a nchri, ¿no ste ni tangi a ko ni ndachro ixi chonda ijie ko xrokuen en? ¿Á ninaa n̄ tjankata a n̄ ijie?

¹¹ Ko je e nchra ndachro nchra:

—Na i, Ncháina, ninaa n̄ ko a n̄.

Ko tjume e ndo Jesús ndachro ndo:

—Kaxon jan an tjankatái a ijie. Satjia ko ínche a ícha ti ndako a juinche e.

Ndo Jesús xro i tingasáñaxin nunte xasintajni

12 *Tjume e ndo Jesús nichja ndo íjngo ngajin na ko ndachro ndo:

—Jan an xro i tingasáña nunte xasintajni. Sen xroruéna xrochónda sen xro i tajon juachaxin tsechón sen kain nchakon ko ítsaji a sen ti naxixe e.

13 *Ko ni fariseo ndachro na:

—Ja ua nichjaxian ixi ja a, ko ti ndachrua tjinte a.

14 Ko juatingíexin ndo Jesús:

—Nge e nichjaxin jan on tjintee ixi nóna no juixin ko nóna no satsji. Ko ja anta noa inta no juixin ko no satsji.

15 Ja anta nchéñanta ijie xranchi chujni nunte xasintajni nchéña ijie. Ko jan an xro an ngisen tjankata a ijie.

16 Ko siá jan an sintaña ijie, ndako ntáña ijie ixi je a jan on ntáña ji i. Ndotána, ndo xruan anna jui i, kayuina ntáñana ijie.

17 Ko ley tsikjin ndo Moisés ndachro siá tsonoxin yuu ni xrochronga á nduaxin jaña tsikon en, jaña xrokonda tsitikaonni na.

18 Ko jan an nichjaxin ixi jan an ko me e ó naa ni chronga nge e, ko kaxon Ndotána, xruan anna jui i, je e ndo nichjaxin ndo ixi najan an. Me e ó yuu sen chronga.

19 Ko juanchangi e na ndo:

—¿No jii Ndotáa?

Ko juate e ndo Jesús:

—Ja anta chuxin antana ko kaxon chuxin anta Ndotána. Siá xrokuichuxinntana, kaxon xrokuichuxinnta Ndotána.

20 Jaña ichro ndo Jesús nchakon juako ndo ngaxin in ni ngo ijié tjenka ti jii ntaa tjinga tomi tajon na. Ko xro an chujni itsé ndo ixi ndo Dio xratajon a ndo juachaxin xrotsé na ndo.

“Jua i itsjinta ti no satsji jan an”

21 Ndo Jesús íjngo ndache ndo na:

—Jan an satsji. Ko ja anta tsjéentana, ko nchakon tsen ennta xratsamanta ijié chondanta. Ko jua i itsjinta ti no satsji jan an.

22 Ko ni judío juao kichuu na ko ndachro na:

—¿Á tsóña xa aséen xa, méxin ndachro xa ixi jua i itsjina tinó satsji xa?

23 Ko ndache ndo Jesús na:

—Ja anta nunte nti inta. Ko jan an juixin ngajní. Ja anta nunte xasintajninta ko jan an je a nunte xasintajnina.

24 Méxin, ndachrjan ixi nchakon tsen ennta xratsamanta ijié chondanta ixi siá tsitikaon anta ngisen ndachrjan, ngisen najan an, nchakon tsen ennta xraxrochondanta ijié.

25 Ko tjume e juanchangi e na ndo:

—¿Ngisen ja a?

Ko juate e ndo:

—Xrangíxixión kuaxi ndachrjan ngisen najan an.

26 Itsjé nge e xrondachrjan ko kaxon sintaña ijié ngajinnta. Ko ngisen xruan anna jui i chronga ndo nge e nduaxin. Ko je o nge e kuin an ndachro ndo xruan anna, me e ntakuan an ni nunte xasintajni.

27 Ko je e na kuienxin a na ti nichja ndo ixi Ndotée ndo jii ngajní.

28 Ko ndachro ndo:

—Nchakon tsjankanitonta ntacru Chjen en ndo Dio, xjan jongí e xranchi chujni, tsono anta ixi jan an nduaxin ngisen ntatjunta ngisen najan an. Ko tsono anta ixi je a jan on tituan an ixra nta a. Na i. Je o nge e juako na Ndotána me e tjako.

29 Ixi ndo xruan anna jui i, ndo me e jii ndo ngajin jan an. Ndotána kuintuna ina ndo jan on ixi kain nchakon titika on nge e tjaun ndo.

30 Nchakon jaña ndachro ndo Jesús kueya na kuitikaon na ndo.

Xranchi ste ni ikjan Chjen en ndo Dio

31 Tjume e ndo Jesús ndache ndo ni judío, ni kuitikaon ndo:

—Siá tsintue anta ti tjako jan an, ja anta nduaxin chujnina.

32 Ko xrochuxinnta ti nduaxin, ko me e xrotjáanta juachaxin ixi jian tsake enta ko xro an ngisen tsantsja anta juachaxin me e.

33 *Ko juate e na:

—Jan anna kuachrjenixinna ndo Abraham, méxin í jua i tsituannana inaa ngisen. ¿Sonda ndachrua ja a jai, xro an ngisen tsingakonnana?

34 Ko ndachro ndo Jesús:

—Naa nge e nduaxin ntatjunta ixi ngisen nche e nge e ndako a, jua i tintu e na ti ndako a, ko ijie chóna na me e tantsje e na juachaxin.

35 Ixi naa ni nchexra jua i titu e na nchia kain nchakon. Ko naa chjen en ni ndo a, tikinixin en xjan titu e xjan nchia kain nchakon.

³⁶ Ko nchakon Chjen en ndo Dio xrotjáanta xjan juachaxin, xro an nge e tsingako annta ko nduaxin chao tsajinta.

³⁷ Ó nóna ixi ja anta tsikachrjenixinnta ndo Abraham. Ko tjaunnta tsóñantana ixi titikaon anta nge e ndachrjan.

³⁸ Jan an ndachrjan nge e ó juakona Ndotána. Ko ja anta titikaonnta nge e ntatjunta ndotáanta.

³⁹ Ko je e na juate e na:

—Ndotánana ndo Abraham.

Ko ndachro ndo Jesús:

—Siá nduaxin xrokjuinta chjen en ndo Abraham xrojuinche enta nge e juinche e ndo.

⁴⁰ Ko jan an ntatjunta nge e nduaxin, nge e ndo Dio juako na ndo, ja anta tjaunnta tson intana. Ndo Abraham nai a juinche e ndo naa nge e jaña.

⁴¹ Ja anta nche enta xraje o nge e nche e ndotáanta.

Ko ndachro na:

—Je a juinchéñamána na. Na i. Chondana naakua Ndotánana me e ndo Dio.

⁴² Ko ndache ndo Jesús na:

—Siá nduaxin ndo Dio Ndotáanta me e xrotjauntana ixi jan an kaxon kuachrjexin ti jii ndo ko nti i ritjén. Je a jan on jui i. Na i. Ndo Dio xruan anna.

⁴³ ¿Sonda tienxin anta nge e ndachrjan? Titikaon anta ixi tjaun anta tsin ennta nge e tjako.

⁴⁴ Ja anta chjen en Xixron anxrée ko ja anta tsikachrjexinnta xa ko tjaunnta tsitikaonnta nge e tjaun xa. Xixron anxrée xrangíxixión tóña xa chujni. Ko nai a nichja xa nge e nduaxin. Kain nchakon ncheya xa ixi jaña xraxaon xa. Je e xa tituan an xa kain juancheya.

⁴⁵ Ko ja an ndachrjan nge e nduaxin ko ja anta titikaon anta.

⁴⁶ ¿Á xrojannta no anta naa ijię junta a? Siá ndachrjan nge e nduaxin, ¿sonda titikaon antana?

⁴⁷ Ngisen titikaon ndo Dio tjaun sen tsin en sen chijnie ndo. Ko ja anta titikaon anta ndo, me e tjaun anta tsin ennta chijnie ndo.

Ndo Cristo sa ó bake e ndo ko tjume e ndo Abraham

⁴⁸ Ko ni judío ndache na ndo Jesús:

—Nduaxin ndako ndachrjanna ixi ja a naa chujni samaritano ko chónnda naa espíritue Xixron anxrée.

⁴⁹ Ko juate e ndo Jesús:

—Xro an espíritue Xixron anxrée chonda. Ixra nta a tajonxin juasaya ngajin Ndotána. Ko ja anta chonda inta juasaya ngajin jan an.

⁵⁰ Jan an tjaun a xrochjana chujni juasaya. Ko jii naa ngisen tjaun ixi chujni xrochjana juasaya, ko je e ndo nchéña ndo ijię ngajin kain chujni.

⁵¹ Naa nge e nduaxin ntatjunta; siá tsitikaonnta nge e tjako, nai a tsen ennta.

⁵² Ko juate e ni judío:

—Jai nóna ixi nduaxin chonda naa espíritue Xixron anxrée. Ndo Abraham ko kain sen kuachronga chijnie ndo Dio sa ó, kuen en sen. Ko ja a ndachrua ixi siá tsitikaonna nge e tjakoa, tsen ana.

⁵³ ¿Á ícha tetuan an ja a ixi ndotánana Abraham? Je e ndo kuen en ndo ko kaxon kuen en sen kuachronga chijnie ndo Dio ó sa ó. ¿Ngisen ja a ixi jaña ndachrua?

⁵⁴ Ko juate e ndo Jesús, ndachro ndo:

—Siá jan on tsajon juasaya ngajin jan an, tjinte a ji i. Ko Ndotána chjána ndo juasaya ko ja anta ndachronta ixi je e ndo, ndo Dio na anta.

⁵⁵ Ko ja anta chuxin anta ndo. Ko jan an chuxin ndo. Siá xrondachrjan chuxin a ndo me e xrojuincheya xranchi ja anta. Ko jan an chuxin ndo ko titika on nge e tituan an ndo.

⁵⁶ Ndo Abraham, ndo tsikachrjenixinnta tsango juaxruxin bake e ndo ixi xrobikon ndo nchakon xrojui i jan an. Ko bikon ndo nchakon me e ko juaxruxin bake e ndo.

⁵⁷ Ko ni judío ndache nã ndo Jesús:

—Ja a xrachonda ia yukante nano, ¿ko sonda ndachrúa ixi ó bikuan ndo Abraham?

⁵⁸ Ko juate e ndo Jesús:

—Naa nge e nduaxin ntatjunta ixi xrako a ndo Abraham, ó ritjén jan an.

⁵⁹ Ko tjume e kua nã ixro xrobanke e nã ndo Jesús, ko je e ndo kuemá ndo, ko kuachrjexin ndo ni ngo nti a. Tjume e kuatsinga ndo ngusine ti ste nã ko sakjui ndo.

9

Ndo Jesús juinchexruen en ndo naa xi tikon a xa

¹ Jitatsinga ndo Jesús naa cha o ko bikon ndo naa xi nchakon tsijongíexón xa tikon a xa.

² Ko sen chrikao ndo juanchangi e sen ndo:

—Maestro, ¿sonda tsijongíexón xa tikon a xa? ¿Á kondeexin jíee ndotée o janée xa o á jíeó xa?

³ Ko juate e ndo Jesús, ndachro ndo:

—Ji i je a jíee xa ko je a jíee ndotée ko janée xa. Jaña tsikon en xa ixí ndo Dio tsjako juachaxien ndo.

⁴ Xratáanchakon xrokonda sinta a ixra tjaun ngisen tsixruan anna. Ko ó tsij tiie ko xro an ngisen chao sinche e ixra.

⁵ *Xraritjén jan an nti i nunte xasintajni, jan an me e xro i tingasáñaxin nunte.

⁶ Ko juexin ndachro ndo ji i, tjume e kuintjí ndo ndatée ndo nunte ko juinchéña ndo nchíin nchita o ko bingamá ndo nchita o me e ikon xi tikon a.

⁷ Ko kuetuen en ndo xa:

—Itjia tuye tjía inda ndatin in Siloé ko tontia inda ikuan. (Ko Siloé xrondachro ngigue e na, tsixrua an.)

Ko sakjui xi tikon a, konti xa inda ikon xa, ko hora ikjan xa ó chao tikon xa.

⁸ Ko ni ndo a tjenka ndo a xa ko ni bakikon ixí tikon a xa, ndachro na:

—¿Á je a xi ji i batjanchiaka a?

⁹ Ko ikaxin na ndachro na:

—Jaán, je e xa.

Ko ikaxin na ndachro na:

—Na i, je a xa. Je o tikonni xa xranchi xi me e.

Ko je e xa juatingíexin xa:

—Jaán, jan anna.

¹⁰ Méxin, juanchangi e na xa:

—¿Xranchi jai chao tikuan?

¹¹ Ko juatingíexin xa:

—Naa ndo ndatin in Jesús juinchéña ndo nchita o bingamá ndo ikon ko tjume e kuetuanna

ndo itsji ti jii pila jitjiá inda nchekin in na Siloé ko tsonti inda ikon. Ko ikjui konti inda, ko tuinxin bikon.

¹² Ko juanchangi e na xa:

—¿No jii xi me e?

Ko juate e xa:

—Nóna i.

Ni fariseo tjanchangí e na xi batikon a

¹³ Ko je e na sabikao na xi batikon a ngajin ni fariseo.

¹⁴ Ko nchakon tjoké e na tsijinchekonchjian ndo Jesús nchita o ko juinchexruen en ndo xi batikon a.

¹⁵ Méxin, ni fariseo juanchangi e na xa íngo xranchi koxruen en xa ko chao tikon xa jai. Ko je e xa ndachro xa:

—Juinchéña ndo chita o bingamá ndo ikon, ko konti inda ikon, ko jai chao tikon.

¹⁶ Ko kaxin ni fariseo ndachro na:

—Xi juinche e ji i, je a chujnie ndo Dio xa ixi chóna i xa juasaya nchakon tjoké eni.

Ko ikaxin na ndachro na:

—¿Xranchi nche e xa ixra ijié siá chóna xa ijié?

Ko jaña je a xraje o xraxaon na.

¹⁷ Tjume e juanchangi e na xi batikon a íngo:

—¿Ja a nge e ndachrua ixi xi juintaxruan an?

Ko je e xa ndachro xa:

—Jan an ndachrjan ixi je e ndo naa ngisen nichja chijnie ndo Dio.

¹⁸ Ko ni judío kuitikaon a na ixi nduaxin batikon a xa ko jai chao tikon xa. Méxin, kuiye e na ndotée ko janée xi tsikoxruen en,

¹⁹ ko juanchangi e na sen:

—¿Á ji i chjan anta, ja anta ndachronta ixi ti jongíexón xa tikon a xa? ¿Ko xranchi jai chao tikon xa?

²⁰ Ko juatingíexin ndotée ko janée xa:

—Nónana ixi xi ji i chjan nana ko nónana ixi nchakon jongí e xa tikon a xa.

²¹ Ko nóna i na xranchi tikon xa jai ko nóna i na ngisen juinchexruen en xa. Tjanchangí enta xa, ó jié xa ko je e xa xrochronga xa xranchi koxruen en xa.

²² Jaña juatingíexin ndotée ko janée xa ixi xrakon en na ni judío, ixi je e na tsindachro na ixi tsantsjexin na ni ngo chujni titikaon ndo Jesús ndo Cristo.

²³ Méxin, ndachro ndotée ko janée xa: “Tjanchangí enta xa ixi ó ijié xa.”

²⁴ Ko ni judío íjngo kuiye e na xi batikon a ko ndache na xa:

—Ndako chronga ngajinxin* ikon ndo Dio ixi ó nónana ixi xi me e ndako a nche e xa.

²⁵ Ko xi batikon a juatingíexin xa:

—Nóna i á chóna ndo ijié o na i. Naakua nge e nóna ixi sa ó batikon a ko jai ó tikon.

²⁶ Ko juanchangi e na xa íjngo:

—¿Xranchi juinche e xa ixi juinchexruan an xa?

²⁷ Ko juatingíexin xa:

—Juexin ntatjunta ko titikaon anta. ¿Sonda tjaunnta íjngo xrondachrjan? ¿Á kaxonnta tjaunnta xrorué enta ndo?

²⁸ Ko koyaku e na xa ko ndachro na:

—Ja a rue é xi me e. Ko jan anna titika onna nge e kuetuan an ndo Moisés.

* **9:24 ngajinxin** delante de

29 Jan anna nónana ixi ndo Dio nichje e ndo ndo Moisés. A xi me e, nóna ina no tsiki x̄in xa.

30 Ko juate e xa ko ndachro xa:

—Tsango jée ji i. Ndo me e juinchexruanna ndo ko chao tikon ko ja anta noa inta no tsiki x̄in ndo.

31 Nónana ixi ndo Dio tien a ndo nge e tjanchia chujni chón̄da ijie. Je o tin en ndo nge e tjanchia sen titikaon ndo, ko sen titikaon nge e tjaun ndo.

32 Ko nai a kuin anna ixi naa ngisen nchexruen en naa chujni xratsijongíexión tikon a.

33 Ko ndo me e, siá xrokuj̄xin a ndo ti jii ndo Dio, xro an nge e jian xrojuinche e ndo.

34 Ko juate e ni fariseo ko ndachro n̄a:

—Ja a kueya ijie chonda nchakon jongí a. Ko jai, ¿á tjaun ixi ja a tsjako n̄ana?

Ko bengixin n̄a xa ni ngo.

Tjaun a n̄a tsienxin n̄a ixi aséen n̄a

35 Ndo Jesús kono e ndo ixi jaña juincheckao ni judío xi batikon a ti bantsjexinna xa ni ngo. Ko kuetan ndo Jesús xi me e ko juanchangi e ndo xa:

—¿Á chuntia Chjen en ndo Dio, xjan jongí e xranchi chujni?

36 Ko ndachro xa:

—Ncháina, ndachijiana ngisen me e ixi xrochuntia ndo.

37 Ko juate e ndo Jesús:

—Ó bikuan ndo. Me e ndo ritjáoa.

38 Ko xi me e bake exin ntatuchi in xa tutée ndo Jesús, ko ndachro xa:

—Jai chuntia, Ncháina.

39 Ko ndachro ndo Jesús:

—Jan an jui i nunte xasintajni ixi sinta a ije ngajin chujni, ixi ni tikon a, tsikon na, ko ni tikon, tsikon a na.

⁴⁰ Ko kaxin ni fariseo ste nti a kuin en na jaña ndachro ndo Jesús ko juanchangi e na ndo:

—¿Á kaxon jan anna tikon ana?

⁴¹ Ko juatingíexin ndo Jesús:

—Ja anta siá nduaxin xrobikon anta, xrochonda inta ije. Ko na ndachronta tikonnta, me e chondanta ije.

10

Ndo Jesús teki ndo kondee noó tijexin kutuchjon

¹ Tjume e ndachro ndo Jesús:

—Nduaxin ntatjunta: ni tsixin a ntachja tijexin kutuchjon, ko tixixin na nango; ni me e nche e na xranchi naa xiche e ko naa ni ndako a nche e.

² Ko ngisen tixixin ntachja, sen me e nduaxin sen tsje e kutuchjon.

³ Ko sen tendáa ntachja tantje e sen ntachja ixi tixin in sen nduaxin tsje e ba, ko kutuchjon chúxin ba tée sen. Ko tiye e sen ngujngu kutuchjon ixi xranchi tin in ba ko tantsjexin sen ba ndo a ba.

⁴ Ko juexin tachrje kain ba, titaon en sen ba cha o ko rué e ba ixi chúxin ba tée sen.

⁵ Ko rue a ba inaa ngisen chúxin a ba; cháña satinga ba ixi chúxin a ba tée je e na.

⁶ Jaña juako ndo Jesús chijni ji i, ko je e na kuienxin a na nge e ndachro ndo.

Ndo Jesús ndo jian tsje e kutuchjon

⁷ Tjume e ndachro ndo Jesús íjngo:

—Nduaxin ndachrjan ixi jan an ntachja me e tixixin kutuchjon.

⁸ Kain ni kujj ti xrati a jan an, ni me e xiche e ko ni tee. Ko kutuchjon kuitikaon a ba na.

⁹ Jan an ntachja me e: siá tixinxinta jan an, tsitjáña inta ko xrokjannta xranchi kutuchjonna tsachrjexin ba ti jije e ba ko tixin in ba ko titja ba nge e ine ba.

¹⁰ 'Ko xiche e je o tij xa ixi tjaun xa tsee xa, ko tsóña xa, ko nchetjáñajin xa kain nge e. Ko jan an jui i ixi tsarichonnta kain nchakon ko xro an nge e tsitjáña anta.

¹¹ Jan an naa ngisen jian tsje e kutuchjon, ko sen jian me e tsenxin sen ixi kutuchjoen.

¹² Ko ngisen je o nche e ixra je o tjaun na tsjacha na; tikon na jitij naa kundanaxra tintu e na kutuchjon ko satsji na ixi je e na je a ngisen nduaxin tsje e kutuchjon ko je a kutuchjoen na. Ko kundanaxra xrotsé ba kutuchjon ko ikaxin kutuchjon satsinga ba, xrochjeke e ba.

¹³ Ko ni me e satsinga na ixi je o tjaun na tsjenge e na na na ko ta i na juachjaon ixi kutuchjon tsje e na.

¹⁴⁻¹⁵ *'Ko jan an naa sen jian tsje e kutuchjon. Ko xranchi Ndotána chúxin na ndo, kaxon jan an chuxin ndo. Jáña chuxin jan an kutuchjonna ko je e ba chúxinna ba. Ko jan an tsenxin ixi kutuchjonna.

¹⁶ Kaxon jan an chonda ikaxin kutuchjon xra je a nti i ste ba ko xrokonda tsikian ba. Ko siá

je e ba tsin en ba ti nichja jan an, tsoña naakua no tsintee ba ko naakua ngisen xrotsje e ba.

¹⁷ Ndotána tjaunna ndo ixi maski tsen én, xroxechónna íjngo.

¹⁸ Xro an ngisen tsantsjena ti ríchon, jan on tajon aséenna tsen en ixi jaña tja on. Chonda juachaxin tsajon aséenna ko chonda juachaxin xroxechónna íjngo. Ji i kuetuanna Ndotána.

¹⁹ Hora kuin en ni judío ti ndachro ndo Jesús, kuaxi nā chjeje e nā íjngo.

²⁰ Kueya nā ndachro nā:

—¿Sonda tin enna inge e ndachro xa? Je e xa chónda xa espíritue Xixron anxrée ko xraxaon a xa jian.

²¹ Ko ikaxin nā ndachro nā:

—Ninaa chujni chónda espíritu ña i nichja jaña. ¿Á chao naa espíritue Xixron anxrée xrokuajon juachaxin ixi naa ngisen tikon a, chao tsikon?

Ni judío kuitikaon a nā ndo Jesús

²² Ko ó nchakuen ikin, tjajna Jerusalén stence e nā kia xraxaonxin nā nchakon juexin tsikoña ni ngo.

²³ Ko ndo Jesús jitji ndo ti ndasin ndatin in Salomón, naa ndasin ni ngo.

²⁴ Ko ni judío kondentájin nā ndo Jesús ko juanchangi e nā ndo:

—Stechon anna tsonónana ngisen ja a. Jai chronga nduaxin á ja a ndo Cristo.

²⁵ Ko juatingíexin ndo Jesús:

—Ó ntatjunta ko titikaon anta. Kain ixra nta a, juachaxien Ndotána nta axin ixra; ko ji i tjakoxin ngisen jan an.

26 Ko titikaon anta ixi je a kutuchjonna ja anta xranchi ntatjunta sa ó.

27 Kutuchjonna chúxin ba taana ko kaxon jan an chuxin ba ko je e ba rua na ba.

28 Jan an tjá a ba juachaxin tsechón ba kain nchakon ko nai a tsitjáña ba ko xro an ngisen tsantsjexin ba ngaya tjáana.

29 Ndotána chjána ndo ba, ndo ícha tetuan an ngajin kainna, ko xro an ngisen tsantsjexin ba itja ndo.

30 Jan an ko Ndotána naakua ngisenna.

31 Ko ni judío íjngo itsé nã ixro xrojuange e nã ndo.

32 Ko ndachro ndo Jesús:

—Kueya nge e jian bikonta junta a ixi juachaxien Ndotána. ¿Sonda tjaunnta tsóñaxinntana ixro ixi junta a kain me e?

33 Ko juate e ni judío:

—Je a ixi kain nge e jian juinche e tsaaxianna ixro. Na i. Ixi nge e ndako a ndachrua, ja a xraje o xranchi inaa chujni, ko ja a ndachrua xixian ndo Dio.

34 Ko ndachro ndo Jesús:

—Ndachro xroon chijnie ndo Dio tsikjin sen sa ó: “Kaxon xranchi ndo Dio ja anta.”

35 Ko nojna ixi nge e ndachro xroon chijnie ndo Dio, jua i tsitikaon ana. Ndachro ndo Dio ixi xranchi ndo Dio ngujngu chujni kuayé e chijnie ndo.

36 Ko ndo Dio kuinche ena ko xruan anna ndo nunte xasintajni, ¿sonda ndachronta ixi jan an nichjangí a ndo Dio ixi ndachrjan jan an Chjen en ndo?

³⁷ Siá jan an xrojuinta i ixra nche e Ndotána, titikaon antana.

³⁸ Ko siá nduaxin nta a ixra nche e Ndotána, maski titikaon antana jan an, titikaonnta ixra nta a ixi ña tsitikaonxinnta ixi Ndotána ko jan an naakuana ko je e ndo jii ndo ngajin ko jan an ritjén ngajin ndo.

³⁹ Ko íjngo xrotsé na ndo Jesús xrobije e na ndo ko je e ndo sakjui ndo.

⁴⁰ *Ko ndo Jesús ikjan ndo íjngo tuenxin ndarío Jordán ti no bake e ndo Juan batikitéxin ndo chujni sa ó.

⁴¹ Ko kueya na rué e na ndo ko ndachro na:
—Nduaxin ndo Juan maski juinche a ndo itsjé ixra ijié, nduaxin chronga ndo ixi xi ji i.

⁴² Ko kueya na jii nti a kuitikaon na ndo Jesús.

11

Kuen en ndo Lázaro

¹ *Bake e naa xi ni e ndatin in Lázaro, tjajnéé xa Betania, tjajnéé nchri María ko nchri Marta, nchri kichuu xa.

² *Nchri María, nchri kichuu xi Lázaro xi ni e, nchri me e nchri bikitée nda chaxro xraxe tutée ndo Jesús ko juinchexemaxin nchra tutée ndo ixi xrajaa nchra.

³ Ko kayui nchra, kichuu nchra, xruan an nchra naa ngisen ndache ndo Jesús:

—Ncháina, xi tjentúa ni e xa.

⁴ Ko kuin en ndo Jesús ko ndachro ndo:

—Ichin chónnda xa je a tsenxin xa ichin me e. Na i. Ji i tsjako juachaxin ijié chónnda Chjen en ndo Dio.

⁵ Ko maski ndo Jesús tsango tjue e ndo nchri Marta, ko kao nchri kichuu nchra ko xi Lázaro,

⁶ hora ndache na ndo ni e xi Lázaro, xrakuitu e ndo yuu nchakon ti no jii ndo.

⁷ Ko tjume e ndache ndo sen chrikao ndo:

—Ichjina íjngo nunte Judea.

⁸ Ko juatingíexin sen chrikao ndo:

—Maestro, xrachónnda i itsjé nchakon, ni judío tjaun na xrokóñaxinna na ixro. ¿Á íjngo tjaunnta itsjinta nti a?

⁹ Ko ndachro ndo Jesús:

—¿Á je a nchakon chónnda teyuu hora? Siá tanchakon ichrjini tontengixin ani ixro ixi jii xro i tingasáñaxin nunte xasintajni.

¹⁰ Ko siá ichrjini tiie tontengixinni ixi ko a xro i.

¹¹ Tjume e ndachro ndo Jesús:

—Xi Lázaro, xi tjentona, jijua xa ko itsji sintaxingama a xa.

¹² Ko ndachro sen chrikao ndo:

—Ncháina, siá jijua xa, chao xroxruen en xa.

¹³ Ko ti ndachro ndo Jesús xrondachro ixi tsiken en xi Lázaro. Ko sen teyuu chrikao ndo xraxaon sen ixi je o ndachro ndo jijua xa.

¹⁴ Tjume e ndako chronga ndo Jesús:

—Xi Lázaro tsiken en xa.

¹⁵ Ko juaxruxin ritjén ixi ko ana nti a ixi ja anta tsikonnta ko tsitikaonnta. Ko jai ichjina tsitsje ena xa.

¹⁶ Tjume e ndo Tomás, ndo nchekin in sen xjan kuatsi, ndache ndo sen kaxin:

—Kao jaina ichjina ko tsen en na xranchi ndo Jesús.

Ndo Jesús sinchexechón ndo chujni

¹⁷ Nchakon kuiji ndo Jesús nti a, kono e ndo ixi xi Lázaro ó chóna noó nchakon tsixrabaa xa.

¹⁸ Tjajna Betania ko tjajna Jerusalén tjenka ste yui tjajna, xranchi yuu kilómetro kutu o kjínxin ste tjajna.

¹⁹ Ko itsjé ni judío ikjui na kuitsje e na nchri Marta ko nchri María, kuinichje e na nchra ixi jitoni e aséen nchra ixi kuen en xi kichuu nchra.

²⁰ Hora kuin en nchri Marta ixi ó jitii ndo Jesús, kuachrje nchra biketan nchra ndo. Ko nchri María kuitu e nchra nchia.

²¹ Ko nchri Marta ndache nchra ndo Jesús:

—Ncháina, siá ja a xrobake e nti i, xrokuen a xi saona.

²² Ko nóna ixi ndo Dio xrotjáa ndo kain nge e tsjanche e ndo.

²³ Ko ndache ndo Jesús nchra:

—Xisaua xroxechón xa íjngo.

²⁴ Nchri Marta ndachro nchra:

—Jan an nóna xroxechón xa íjngo nchakon xroxechón kain ni tsiken en, nchakon tsjexixin kain nge e.

²⁵ Ko ndachro ndo Jesús:

—Jan anntaxechón chujni ko tajon juachaxin tsechón chujni. Ngisen titikaonna, maski tsen en sen, xroxechón sen íjngo.

²⁶ Ko kain sen xra jichón ko titikaon sen, nai a tsen en sen. ¿Á titikáonan ji i?

²⁷ Je e nchra ndachro nchra:

—Jaán, Ncháina, jan an titika on ixi ja a ndo Cristo, Chjen en ndo Dio, ndo xrokuii nunte xas-intajni.

Tsjanga ndo Jesús ti tsixrabaa ndo Lázaro

²⁸ Ó juexin ndachro nchri Marta jaña, ko sakjui nchra kuiye e nchri kichuu nchra, nchri María, ko imao ndache kichuu nchra:

—Ndo Maestro jii ndo nti i ko tiya a ndo.

²⁹ Ko kuin en nchri María, tuinxin bingatjen nchra sakuitsje e nchra ndo Jesús.

³⁰ Ko ndo Jesús xratsikixin a ndo tjajna, xra jii ndo ti no kuetanxin ndo nchri Marta.

³¹ Ko ni judío, ni jinichje e nchri María stenchecháxin nã nchra, bikon nã ixi taka kuachrjexin nchra nchia, ko rué e nã nchra ixi xraxaon nã ixi satsji nchra ti no tsixrabaa xisaoe nchra, ko nti a xrotsjangaxin nchra xa.

³² Tjume e nchri María kuiji nchra ti jii ndo Jesús, bake exin ntatuchi in nchra tutée ndo, ko ndachro nchra:

—Ncháina, siá xrobake e nti i xrokuen a xisaona.

³³ Ko bikon ndo Jesús jitsjanga nchri María ko ni judío kuijikao nchra, me e tsango juincheni e ndo.

³⁴ Ko juanchangi ndo:

—¿No juabaanta xa?

Ko ndachro nã:

—Ncháina, xrokuia tsje é.

³⁵ Ko tsjanga ndo Jesús.

³⁶ Ko ndachro ni judío:

—Tsje enta tsango tjue e ndo xi tsiken en.

³⁷ Ko ikaxin nã ndachro nã:

—Je e xa juinche e xa ixi chao bikon xi batikon a. ¿Á jua i xrokuajon xa juachaxin ixi xrokuen a xi Lázaro?

Xechón xi Lázaro

³⁸ Ko tsango koni e aséen ndo Jesús ko konchjiñe e ndo ti no tsixrabaa xi Lázaro. No tsixrabaa xa naa itjaq* me e ko nduja tsikijeexin na naa ixro.

³⁹ Ko kuetuan an ndo Jesús:

—Tintjiannta ixro.

Ko nchri Marta, nchrikichuu xi tsiken en, ndachro nchra:

—Ncháina, já ó bakaxra ndo ixi chónnda xa noó nchakon kuen en xa.

⁴⁰ Ko ndachro ndo Jesús:

—Á ntatju ia ixi siá tsitikaoan tsikuan naa ixra ijié sinche e ndo Dio ixi juachaxien ndo.

⁴¹ Tjume e kuintjian na ixro. Ko ndo Jesús tsje e ndo ngajní, ko ndachro ndo:

—Ndotána, tajon juasiana ngajinnta ixi ó kuin ennta nge e ndachrjan.

⁴² Jan an nóna ixi kain nchakon tin ennta nge e ntatjunta ko jai jaña ntatjunta ixi tsin en ni ste nti i ko tsitikaon na ixi ja anta xruan anntana jui i.

⁴³ Ko juexin ndachro ndo ji i, séen kuyako ndo:

—¡Lázaro, tachrjexian ña!

⁴⁴ Ko xi tsiken en tuinxin kuachrje xa, ko itja xa ko tutée xa jixritexin ixi manta ko ikon xa jisiamá inaa manta. Ko ndachro ndo Jesús:

—Tonxindange enta xa ko tintu enta satsji xa.

* **11:38** *itjaq* cueva

*Xraxaon n̄a xranchi tsóña n̄a ndo Jesús
(Mt. 26:1-5; Mr. 14:1-2; Lc. 22:1-2)*

⁴⁵ Ko kueya ni judío, ni kuijikao nchri María bikon n̄a nge e juinche e ndo Jesús ko kuitikaon n̄a ndo.

⁴⁶ Ko ikaxin n̄a kuitsje e n̄a ni fariseo, ko beki n̄a nge e tsijinche e ndo Jesús.

⁴⁷ Tjume e xi fariseo ko xitaana tetuan an xra o n̄a ngajin chujni ícha tetuan an, ko ndachro xa:

—¿Nge e sintu una ixi xi ji i jinche e xa itsjé nge e ijié?

⁴⁸ Siá tsintu ena xa, tjume e kain n̄a tsitikaon n̄a xa, ko tsii ni tetuan an Roma ko tsonchjejin n̄a ningoina ko sinchetjáña n̄a tjajnaina.

⁴⁹ Ko naa xi tin in Caifás, xitaana ícha tetuan an nano me e, ndache xa n̄a:

—Ja anta xro an nge e no anta

⁵⁰ ko xraxaon anta ixi ícha jian naakua chujni tsen en ixi tjajnaina ko je a kain ni tjajnaina tsitjáña n̄a.

⁵¹ Ko xi Caifás je a je e xi tsixraxaon xa ja in, Espíritue ndo Dio juincheno e xa ixi ndo Jesús tsenxin ndo tjajnée ni judío ixi je e xa tetuen en xa xitaana nano me e.

⁵² Ko je a je o tjajna me e xrokuenxin ndo. Na i. Kaxon xrokuenxin ndo ixi xroxra o kain chjen en ndo Dio, xjan tsichjeke e nchiji nunte xasintajni.

⁵³ Ko hora me e ni tetuen en ni judío juangíxin n̄a xraxaon n̄a xranchi naatsóñaxón n̄a ndo Jesús.

⁵⁴ Méxin, nchakon me e ndo Jesús í bakonoxin a ndo ngakjen en ni judío, ko kuachrjexin ndo nunte Judea, sakjui ndo tjenka ijna, ti jii naa tjajna

ndatin in Efraín. Nti a kuituekao ndo sen teyuu chrikao ndo.

⁵⁵ Xratitjáña xrokui kia Pascua, kiée ni judío ko kueya n̄a kuachrxexin n̄a t̄jajnéé n̄a sakjui n̄a t̄jajna Jerusalén ixi nti a sintakji n̄a ixi tsontjúá n̄a ti xراتi a kia Pascua.

⁵⁶ Nti a stetjée n̄a ndo Jesús ko kuiji n̄a ngaxin in ni ngo ijié ko ndache kichuu n̄a:

—¿Ja anta nge e chronta? ¿Á ts̄ji xa kia o na i?

⁵⁷ Ko xi fariseo ko xi tetuen en xitaana kuetuan an xa ixi siá xrojan ngisen no e no jii ndo Jesús xrochronga n̄a ko jaña xrotsé xa ndo ko xroxraxin in xa ndo ndo achjiso.

12

Naa nchri bingamá nchra ndaxi e chaxro xraxe tutée ndo Jesús

(Mt. 26:6-13; Mr. 14:3-9)

¹ Xratitjáña ikjaon nchakon xrokuji kia pascua, ndo Jesús ikjui ndo t̄jajna Betania ti jii xi Lázaro. Xi me e ndo Jesús juinchexechón ndo xa.

² Ko nti a juine sen naa kónkjín ko kuajon sen juasaya ngajin ndo Jesús. Nchri Marta juinchekonchjian nchra ti juine sen ko xi Lázaro ko ikaxin sen ste sen stenekao sen ndo Jesús.

³*Tjume e nchri María bika o nchra xranchi tu o litro nda chaxro xraxe tsikoña xroan nardo tsango tjintee tsike na nchra ko bingamá nchra tutée ndo Jesús, ko ixi xrajée nchra juinchexemaxin nchra tutée ndo, ko nguixin ngaxin in nchia bakaxraxe xroan me e.

⁴ Ko xi Judas Iscariote, ndotée xa ndatin in Simón, je e xa naa sen teyuu chrikao ndo Jesús, ko xi me e sinchekji ndo ícha tjume e, ndachro xa:

⁵ —¿Sonda konchji a xroan xraxe? Xrokúchjixin ní ciento tomi denario ixi xrobingijnaxinni ni nóa.

⁶ Ko xi Judas je a ndachro xa jaña ixi tikonóe e xa ni nóa. Na i. Ndachro xa ji i ixi ché e xa, ko je e xa tsje e xa nge e tjinga tomi ko kain nchakon tee xa tomi tsixra o nti a.

⁷ Méxin, ndachro ndo Jesús:

—Tintu enta nchra. Tsikatsi in nchra xroan xraxe ji i ixi nchakon xroxrabaana.

⁸ Ni nóa kain nchakon tsariku unta n̄ ko jan an kain a nchakon xrochondantana.

Ni judío t̄jao n̄ xranchi tsóña n̄ ndo Lázaro

⁹ Tjume e kueya ni judío kono e n̄ ixi ndo Jesús jii ndo tjajna Betania, ko sakjui n̄ nti a. Je a je o xrokuitsje e n̄ ndo. Kaxon t̄jaun n̄ xrokuitsje e n̄ xi Lázaro, xi juinchexechón ndo Jesús.

¹⁰ Tjume e xitaana tetuan an juao kichuu xa ko xraxaon xa naatóñaxón xa xi Lázaro kaxon

¹¹ ixi kondeexin je e xa kueya ni judío stetingaxiton n̄ ngajin xitaana ko jititikaon n̄ ndo Jesús.

Ndo Jesús tixin in ndo tjajna Jerusalén

(Mt. 21:1-11; Mr. 11:1-11; Lc. 19:28-40)

¹² Kueya n̄ satsikji n̄ tjajna Jerusalén kia Pascua. Ko ndúyaxin kono e n̄ ixi tsiji ndo Jesús tjajna nti a.

¹³ Ko konchrinjin n̄ chaan ntakajne ko kuachrje n̄ ngatja cha o kuayé e n̄ ndo Jesús, ko séen ndachro n̄:

—Juasaya ngajin ndo Dio. Tsango jian ndo kuixin ixi juachaxien Ndotáina jii ngajní. Tsango jian ndo Rey tetuen en tjajna Israel.

¹⁴ Ko kuitja ndo Jesús naa kuntajno ko kueta a ndo ba, xranchi jitaxin chijnie ndo Dio:

¹⁵ Xrakon a ja a tjajna Jerusalén, tsje e jitii ndo Rey na a, jita a ndo naa kuntajno.

¹⁶ Ko nchakon kon en ji i, sen teyuu chrikao ndo Jesús kuienxin a sen sonda kon en. Tjume e nchakon juexin sakjui ndo Jesús ngajní, xraxaon sen ixi jaña jitaxin xroon tsikjin ni kuachronga chijnie ndo Dio sa ó, xranchi tson en ndo, ko nduaxin jaña kon en.

¹⁷ Jaña kain ni bake e ngajin ndo Jesús nchakon kuiye e ndo xi Lázaro kuachrxexin xa ti no tsixrabaa xa ko xechón xa, ni me e beki na nge e bikon na.

¹⁸ Méxin, kueya na bijirue e na ndo Jesús ngatja cha o, ixi ó kono e na ixra ijié tsijinche e ndo.

¹⁹ Méxin, xi fariseo juao kichuu xa:

—Ó bikonta, jua i ngakon en na, tsje enta kain na rué e na xa.

Kaxin ni ngigua griego tjée na ndo Jesús

²⁰ Kaxin ni nichja ngigua griego bake e na ngakjen en ni kuii kia tjajna Jerusalén xroxraxaonxin na ndo Dio.

²¹ Me e konchjiñe e na ngajin ndo Felipe, ndo tjajna Betsaida, nunte Galilea, ko kuinóatée na ngajin ndo ko ndachro na:

—Tja onna tsikonna ndo Jesús.

²² Ko ndo Felipe kuiji ndo kuindache ndo ndo Andrés. Ko tjume e yui sen kuindache sen ndo Jesús.

²³ Ko ndachro ndo Jesús:

—Ó kuiji hora, ixi Chjen en ndo Dio, Xjan jongí e xranchi chujni, satsji ndo tsayé e ndo juachaxien Ndotée ndo.

²⁴ Ko nduaxin nge e ntatjunta ixi siá tsitsinga naa noatrigo ngata a inche, ko tsen a noa, je o naa noa tsitu e. Ko siá tsen en noa, tjume e tsoña kueya noa ixi jaña tsandáani no.

²⁵ *Ko ni tjue e aséen ixi xro an nge e sintakon en na, ni me e sinchetjáña na ti tsechón na kain nchakon. Ko ngisen ningakon en aséen maski xrokuen en sen nti i nunte xasintajni ixi xrochronga sen chijnie ndo Dio, sen me e xrochónda sen juachaxin tsechón sen kain nchakon.

²⁶ Siá xrojan ngisen tjaun sinche e xrana, xroruana sen. Ko ti no tsake e jan an, nti a kaxon tsake e sen nche e xrana. Siá xrojan ngisen sinche e xrana, Ndotána tsjenge e ndo sen na.

Ndo Jesús chronga ndo tsen en ndo

²⁷ 'Ko jai tsango toni e aséenna. ¿Nge e xron-dachrjan? ¿Á xron-dachrjan: “Ndotána tájon anta juachaxin nge e tsónna jai”? Ko ixra me e juixin nti i ixi jaña tsónna.

²⁸ Cháña xron-dachrjan: “Ndotána, tsjakonta juachaxin ijié chonda ngajin chujni nunte nti i.”

Hora me e kuin en na nichja naa téé ngajni ko ndachro:

—Ó juexin juako juachaxinna ko íjngo sinta a me e.

²⁹ Ko ni ste nti a stetin en na, méxin, ndachro na jitjatee ngajní, ko ikaxin na ndachro na:

—Naa ndo ángel nichje e ndo.

³⁰ Ko ndachro ndo Jesús:

—Tée kuin ennta, kujxin ngajní ixi tsitikaonntana.

³¹ Ko jai ndo Dio sinchéña ndo ije ngajin chujni nunte xasintajni, ko jai Xixron anxrée tetuan an xa nunte xasintajni tsachrxexin xa nti i.

³² Ko nchakon tsake e nganito ntacru, kueya na tsikon na ko tsitikaonna na.

³³ Jaña ndachro ndo ixi jichrónga ndo xranchi tsenxin ndo.

³⁴ Ko juate e ni ste nti a:

—Kuin anna ndachro xroon tsikjin sen sa ó ixi ndo Cristo kain nchakon tsechón ndo ko, ¿sonda ndachrua ja a ixi Chjen en ndo Dio, xjan jongí e xranchi chujni, xrokonda tsake e na xjan nganito ntacru? ¿Ngisen Chjen en ndo Dio ikjan xranchi Chujni?

³⁵ Ko ndachro ndo Jesús:

—Xratsake e xro i ngajinnta, ko je o kaxion nchakon. Tajinta ixi xrachondanta xro i ji i ixi sintaxronka inta ti naxixe e. Ixi ngisen taji ti naxixe e tikon a na no taji na.

³⁶ Titikaonnta xro i tingasáña ixi ngajinnta jii xro i ixi xrokjannta chujni jian chónnda xro i.

Ko juexin ndachro ndo Jesús ji i, tjume e sakjui ndo kuemá ndo.

Ni judío titikaon a na ndo Jesús

³⁷ Maski ndo Jesús tsijinche e ndo kueya ixrā ijié ngato ikon nā, kuitikaon a nā ndo

³⁸ ixi xrokonda jaña tson en xranchi nge e tsikjin ndo Isaías sa ó:

Ncháina, ¿ngisen titikaon nge e nichjana?

¿Ngisen juincheno e ndo Dio juachaxien ndo?

³⁹ Méxin, kuitikaon a nā ndo Jesús ixi kaxon tsikjin ndo Isaías:

⁴⁰ Ndo Dio kuajon ndo juachaxin ixi tsikon a nā

ko juinchecha ndo aséen nā,

ixi tsikonxin a nā ikon nā,

ko tsienxin a nā ixi aséen nā,

ko xrokjan i nā ngajin ixi syntaxruan an nā.

⁴¹ Jaña tsichro ndo Isaías sa ó ixi tsikikon ndo juachaxin ijié chóna ndo Jesús ko nichja ndo ixi je e ndo.

⁴² Ko kueya ni judío tetuan an kuitikaon nā ndo Jesús, ko bachronga i nā ixi ó kuitikaon nā ndo ixi xrakon en nā xi fariseo, ixi je e xa xrokuantsjexin xa nā ningue ni judío.

⁴³ Ixi je e nā ícha banche e nā juaxruxin bakayé e nā juasaya tajon chujni ixi juasaya tajon ndo Dio.

Nge e ndachro ndo Jesús tsóñexin chujni ijié

⁴⁴ Ko ndo Jesús séen ndachro ndo:

—Ngisen titikaonna, je a je o jan an titikaonna sen, kaxon titikaon sen Ndotána, ndo xruan anna jui i.

⁴⁵ Ko ngisen tikonna kaxon tikon sen ndo tsixruan anna.

⁴⁶ Jan an xro i kuji nunte xasintajni ixi sen titikaonna tsake a sen ti naxixe e.

⁴⁷ Ko xrojan ngisen tin en nge e ndachrjan ko tsitikaon ana nā, je a jan an tsjankata a nā ijié. Ixi

jan an jui a tsjankata a jíee chujni nunte nti i. Na i. Jui i tsingijna nā x̄i tsitjáña i nā.

⁴⁸ Ko chujni titikaon ana ko titikaon a chijnina ó jii ngisen tsjankata a nā ijiē. Chijni nichja me e chijni sinchéña ijiē ngajin nā nchakon tsjexixin nunte xasintajni.

⁴⁹ Ixi jan an nichjaxin a jan on. Na i. Ndotána, ndo tsixruan anna, kuetuanna nge e xronichja ko nge e sintakuan an chujni.

⁵⁰ Ko nóna x̄i ti kuetuan an Ndotána me e tajon juachaxin tsechón chujni kain nchakon. Méxin, kain nge e ndachrjan, Ndotána kuetuanna xronichja.

13

Ndo Jesús néma ndo tutée sen chrikao ndo

¹ Titjáña naa nchakon tsiī kia pascua ko ndo Jesús ó no e ndo kuiji hora satsjixin ndo nunte xasintajni, ko satsji ndo ti Ndotée ndo. Kain nchakon tjue e ndo sen chujnie ndo ste nunte xasintajni, ko jai ícha tjakoxin ndo x̄i tjue e ndo sen.

² Ko ó kuij̄i hora sine sen tsokjín, ko Xixron anxrée ó tsixraxin in xa aséen xi Judas Iscariote, ndotée xa ndatin in Simón, sinchekji xa ndo Jesús.

³ Ndo Jesús no e ndo x̄i tsikix̄in in ndo ti jii ndo Dio ko ti no xrokjan ndo. Ko no e ndo x̄i Ndotée ndo kuajon ndo juachaxin tsetuen en ndo kain nge e.

⁴ Tjume e bingatjen ndo ti no stene sen ko kuantsje ndo manta jitsáa ndo, ko kua ndo naa manta xemaxinni, ko bingatóxin ndo manta.

⁵ Ko bikia ndo inda ngaya naa tjatu o, ko kuaxi ndo juné ma ndo tutée ngujngu sen chrikao ndo, ko juinchexemaxin ndo ixi manta jingatoxin ndo.

⁶ Ko hora kuiji ndo ti jii ndo Pedro, ndo Pedro ndachro ndo:

—Nchána, ¿á ja anta sinémanta tutéena?

⁷ Ko juatingíexin ndo Jesús:

—Jai tienxin a nge e rinta a. Tjume e tsienxian sonda rinta a ji i.

⁸ Ko ndachro ndo Pedro:

—Nai a sinémanta tutéena.

Ko ndachro ndo Jesús:

—Siá sinéma i tutáa, ninge o tsikinixin a ngajin.

⁹ Ko juate e ndo Simón Pedro:

—Na i, Nchána. Je a je o tutéena né manta. Kaxon né manta tjáana ko jáana.

¹⁰ Ko ndo Jesús ndachro ndo:

—Ngisen tsikengi xrokonda i tsengi sen íjngo. Je o tutée sen tsijma ixi nchijíi sen tjúá sen. Ko ja anta tjúánta, maski je a kainnta.

¹¹ Ndachro ndo Jesús je a kainnta tjúánta, ixi no e ndo ngisen xrojuinchekji ndo.

¹² *Juexin juné ma ndo tutée kain sen, tjume e itsé ndo mantée ndo, manta jitsáa ndo, ko ikjan ndo bake e ndo nunte ti no stene sen ko ndachro ndo:

—¿Á tienxinnta nge e junta a?

¹³ Ja anta tiya nantana ngisen tjako anta ko Ncháanta, ko ndako ndachronta ixi jan an ngisen me e.

14 Siá jan an ngisen tjako anta ko Ncháanta jan an, ko juné ma tutáanta, kaxon jaña ja anta xrojuinéme e kichuunta tutáanta.

15 Ixi jan an juako xranchi junta a, kaxon ja anta sinche enta jaña.

16 *Naa nge e nduaxin ntatjunta ixi ni nche e ixra, je a ícha tjintee na ixi ni xrée, ko ninaa ngisen tikao naa juajna, tjinte a na ícha ixi ni tsixrua an juajna.

17 Siá tienxinnta ko siá sinche enta ji i, juaxruxin tsake enta.

18 'Je a ixi kainnta ndachrjan ji i. Jan an nóna ngisen kuincha a. Ko xrokonda tson en xranchi tsikjin sen sa ó: “Ngisen neki an, ni me e tsingaxiton na ngajin.”

19 Jan an ntatjunta ixi nchakon tson en ji i, ja anta tsitikaonnta ixi jan an ngisen ntatjunta ngisen najan an.

20 *Naa nge e nduaxin ntatjunta, ixi ngisen tayé e naa sen xruan an jan an, kaxon jan an tayé ena sen, ko ngisen tayé ena jan an, tayé e sen ngisen tsixruan anna jui i.

Ndo Jesús chronga ndo ixi xi Judas sinchekji xa ndo

(Mt. 26:20-25; Mr. 14:17-21; Lc. 22:21-23)

21 Ko juexin ndachro ndo Jesús ji i, tsango koni e aséen ndo ko ndako ichro ndo:

—Nduaxin ntatjunta ixi naa ja anta sinchekjintana.

22 Ko sen teyuu chrikao ndo kuaxi tsje e kichuu sen ixi noe a sen ngisen sinche e ti ndachro ndo.

²³ Ko naa ndo chrikao ndo Jesús, ndo me e ndo Jesús tsango tjue e ndo, jii ndo nunte tjenka ndo Jesús ti no stene sen.

²⁴ Ko ndo Simón Pedro jinchetengi ndo ndo me e ixi tjanchangí e ndo ndo ngisen sinche e ti ndachro ndo Jesús.

²⁵ Tjume e je e ndo konchjiñe e ndo ti jii ndo Jesús, ko juanchangi ndo:

—Ncháina, ¿ngisen sinche e me e?

²⁶ Juate e ndo Jesús:

—Ngisen xrotjá a tu o nutja tsikontjao, me e je e xa.

Méxin, juinchetjao ndo tu o nutja ko kuajon ndo ngajin xi Judas Iscariote, chjen en ndo Simón.

²⁷ Ko kuayé e xi Judas nutja, ko tuinxin Xixron anxrée kuixin in xa aséen xi Judas. Ko ndo Jesús ndache ndo xa:

—Nge e sinche e, jaiko xakon an nche e me e.

²⁸ Ko ninaa sen stene nti a kuienxin sen sonda jaña ndachro ndo.

²⁹ Kaxin sen xraxaon sen ixi xi Judas tsje e xa ti jitjinga tomi, méxin ndo Jesús kuetuen en ndo xa ixi tsike na xa nge e ixi ó tsii kia, o xrokuajon xa nge e ngajin ni nóa.

³⁰ Juexin kuayé e xi Judas nutja, tuinxin kuachrje xa ko ó tiie me e.

Naa nge e natjúá kuetuan an ndo Jesús

³¹ Ko ó juexin satsikji xi Judas, ndachro ndo Jesús:

—Jai tsonoxin juachaxien Chjen en ndo Dio, xjan jongí e xranchi chujni, ko tsjakoxin ndo juachaxin ijié chóna ndo Dio.

³² Siá Chjen en ndo Dio, xjan jongí e xranchi chujni, tsjakoxin ndo juachaxin ne e ndo Dio, ko me e jaña ndo Dio tsjakoxin ndo juachaxin chónnda Chjen en ndo, ko tuinxin tson en me e.

³³ *Chjan na, xranaanchion tsake e ngajinnta nti i. Tjéentana ko xranchi ntatjan ni judío, jaña ntatjunta kaxon: Ti no itsji jan an, jua i itsjinta.

³⁴ *Naa nge e natjúá tetuan anta ixi xrotjue enta kichuunta xranchi jan an tjua anta.

³⁵ Ji i tsjakoxin ngajin kain ni xasintajni ixi ja anta chujninanta siá xrotjue enta kichuunta.

Ndo Jesús ndachro ndo nge e sinche e ndo Pedro (Mt. 26:31-35; Mr. 14:27-31; Lc. 22:31-34)

³⁶ Tjume e juanchangi e ndo Simón Pedro ndo Jesús:

—Nchána, ¿no itsjinta?

Ko juate e ndo Jesús:

—Ti no satsji, jua i itsjia jai. Ko tjume e xroru-
anana nti a.

³⁷ Ko ndachro ndo Pedro:

—¿Sonda jua i xrorua a jai? Jan an chao tsenx-
inna ixi ja anta.

³⁸ Ko ndo Jesús juate e ndo:

—¿Á nduaxin tsenxian ixi jan an? Nduaxin
ntatjua xraxrotsje a kuntaxichíká, ní
xrondachrua chuxin ana.

14

Ndo Jesús cha o satsjixinna ti Dio jii ngajní

¹ 'Ta inta juachjaon. Titikaonnta ndo Dio, titikaonntana jan an kaxon.

² Ndo a Ndotána kueya nchia jii. Ko siá je a xrobake e nchia, jan an xrontatjunta. Méxin, satsji, sintakonchjian no tsake enta.

³ Ko siá satsji ko sintakonchjian no tsake enta, tsji i íjngo, ko tsjirua anta ixí ti no tsake e jan an kaxon ja anta tsake enta nti a.

⁴ Ja anta no anta no itsji ko no anta cha o.

⁵ Ko juate e ndo Tomás:

—Ncháina, nóna ina ti no itsjia. ¿Xranchi xrokónona cha o me e?

⁶ Ko ndachro ndo Jesús:

—Jan an cha o ko jan an chijni nduaxin ko jan an tsajon juachaxin stechón chujni. Xro an ngisen itji ti jii Ndotána siá tsjixin a sen ixí jan an.

⁷ Siá chuxinntana, kaxon xrochuxinnta Ndotána ko ó chuxinnta ndo jai ko ó bikonta ndo.

⁸ Ko ndachro ndo Felipe:

—Nchána, tjako nana Ndotáa. Me ó tja onna.

⁹ Ko ndo Jesús ndachro ndo:

—Felipe, ó itsjé nchakon ritjén ngajinnta, ¿ko xrachuxin ana? Ngisen bikona ó bikon Ndotána kaxon. ¿Sonda ndachrua ja a ixí tsjako a Ndotána?

¹⁰ ¿Á titikaon anta ixí jan an riní Ndotata, ko Ndotata jii ndo ngajin? Ti nge e nichja jan an je a ti tja on nichja. Na i. Ko Ndotána ndo jii ngajin, je e ndo nche e ndo ixra.

¹¹ Titikaonnta ixí jan an ritjén ngajin Ndotána, ko Ndotána jii ndo ngajin. Maski titikaon anta ji i, tsitikaonxinnta ixí ti ixra ijíe junta a ko nge e bikonta.

¹² Naa nge e nduaxin ntatjunta siá nduaxin tsitikaonnantana, ti junta a kaxon ja anta chao

sinche enta kain me e ko kaxon ixra ícha ijié nge e sinche enta ixi jan an satsji ti jii Ndotána.

¹³ Kain nge e tsjanche enta Ndotána ixi nombréena, jan an sinta a ixi jaña tsjako juachaxien Ndotána.

¹⁴ Siá xrojan nge e tsjanchaxinnta nombréena, jan an tsajon.

Ndo Jesús xroxruan an ndo Espíritue ndo Dio

¹⁵ Siá nduaxin tjuananta, titikaonnta nge e kuetuan annta.

¹⁶ Ko jan an tsinóatáana ngajin Ndotána ixi xroxruan an ndo Espíritue ndo ixi tsingijnanta ko tsajon ndo juachaxin tsake e juaxruxin asáanta ko Espíritue ndo tsake e ngajinnta kain nchakon,

¹⁷ Espiritu nduaxin. Ti ni nunte xasintajni jua i tsayé e na Espiritu ko chúxin a na Espiritu. Ko ja anta chuxinnta Espiritu ixi ngajinnta jii ndo ko je e ndo tsitu e ndo ngajinnta kain nchakon.

¹⁸ Jan an tsintua inta nóanta ko ja onta; xrokjanna íjngo ixi tsake e ngajinnta.

¹⁹ Ko itsjé a nchakon chujni nunte xasintajni tsikon anana. Ko ja anta tsikonntana ixi ja anta tsarichonnta ixi jan an ríchon.

²⁰ Ko nchakon me e tsono anta ixi jan an ko Ndotána naakuana ko ja anta ko jan an naakuana kaxon.

²¹ Ngisen no e ko titikaon nge e kuetuan an, sen me e tjua na. Ko sen tjua na, Ndotána kaxon xrotjue e ndo sen, kaxon jan an tjua a* sen ko tsichuxinna sen.

²² Ko xi Judas, je a xi Iscariote, ndache xa ndo:

* **14:21 tjua a** yo te amo

—Ncháina, ¿sonda jan anna xrochuxiana ko ikaxin ni nunte xasintajni, na i?

²³ Ko juate e ndo Jesús ndachro ndo:

—Ngisen tjuana, sen me e titikaon nge e tituan an. Ko Ndotána xrotjue e ndo sen, ko Ndotána ko jan an tsji ina tsinteena ngajin sen.

²⁴ Ko ngisen tjaun ana, ni me e titikaon a na nge e ndachrjan. Ko nge e chijni tin ennta, je a chijnina. Na i. Ji i chijnie Ndotána, ndo xruan anna jui i.

²⁵ Rintatjunta kain ji i xixi xraritjén ngajinnta.

²⁶ Ko Espíritue Ndotána, xroxruan an ndo juachaxin xixi nombréena, xixi tsingijnanta, ko xronichja anta ndako ko tsjako anta kain nge e ko sintaxraxaonnta kain nge e ntatjunta.

²⁷ Juaxruxin tinto anta ko juaxruxin tajon ngajinnta. Je a xranchi juaxruxin tajon ni nunte xasintajni. Na i. Xrakon anta ko ta inta juachjaon.

²⁸ Ó kuin ennta nge e ndachrjan, satsji ko xrokjanna íjngo ko tsake e ngajinnta. Siá nduaxin tjaunnanta, juaxruxin xrobake enta xixi no anta satsji ti jii Ndotána xixi ícha tetuan an je e ndo xixi najan an.

²⁹ Sa ó ntatjunta ji i xixi nchakon tsikonnta tson en, tsitikaonnta.

³⁰ Ko sé a xronichjana jai xixi jitií Xixron anxrée, xi tetuen en chujni nunte xasintajni. Ko je e xa xro an nge e tetuen en xa ngajin.

³¹ Ko xrokonda jaña tson en xixi chujni nunte xasintajni tsono e na xixi jan an tjuana Ndotána ko titikaon nge e tetuanna ndo. Ko jai tingatjennta sachjinxina nti i.

15

Ntaa tajon tu uva ko chaan ntaa

¹ 'Jan an me e xranchi naa viña jichón ko Ndotána xranchi ngisen tayakon en ntaa.

² Tsonchrijin ndo chaan ntaa tajon a itu ko tsame e ndo ntaa ko tayakon en ndo ntaa ixi ícha itsjé itu tsajon ntaa.

³ Ko ja anta ó tjúá asáanta ixi chijni tjá anta.

⁴ Take énta ngajin xranchi jan an ritjén ngajin-nta. Xranchi chaan ntaa jua i je o chaan ntaa tsajon itu siá jitse a kichuu ntaa, jaña ja anta kaxon jua i sinche enta nge e siá ste anta ngajin.

⁵ 'Jan an ntaa ijié tajon tu uva, ko ja anta chaan ntaa. Ngisen jitséxin najan an ko jan an ngajin sen tsajon sen kueya itu ixi ja anta jua i sinche enta naa nge e siá ritjén a ngajinnta.

⁶ Ko ngisen jitseni a jan an, ni me e jii nā xranchi chaan ntaa tjankana ndá a ixi xroxema ntaa ko tsjaaka nā ntaa.

⁷ 'Ko siá ja anta steniintana, ko xrotjáña inta nge e juentakuan annta, tjanchianta nge e tjaunnta ko tsaye enta.

⁸ Ndotána tayé e juasaya siá ja anta tájonnta itsjé itu. Ko jaña tsjakoxinnta ixi titikaonntana.

⁹ Jan an tsango tjua anta xranchi Ndotána tjua na. Tintue anta ti tjua anta jan an.

¹⁰ Siá tsitikaonnta ti kuetuan annta, tsono anta ixi tjua anta xranchi kaxon jan an titika on nge e kuetuanna Ndotána ko nóna ixi je e ndo tjua na ndo.

¹¹ 'Jaña nichja anta ixi tsake enta juaxruxin ngajin ko juaxruxin tsake e asáanta.

12 *Ti tetuan annta me e ji i: tjue enta kichuunta xranchi jan an tjua anta.

13 Ngisen ícha tjue e naa ngisen, ba tsen en sen ixi ngisen tjue e sen.

14 Ja anta chujni tjento siá tsitikaonnta ti tetuan annta.

15 Ítiya inta ni nche e ixra, ixi chujni nche e ixra noe a sen nge e nche e xi tetuen en sen. Ko ja anta chujni tjentona ixi kain nge e juinchekuanna Ndotána, juintano anta.

16 Kuinche antana ja anta. Jan an kuincha anta ko kuinóatána ngajinnta ixi itsjinta ko tájonnta itsjé itu ko tsitjáña i tu. Ko jaña Ndotána xrotjá anta ndo kain nge e tsjanchiixinnta nombréena.

17 Jaña tetuan annta ixi xrotjue enta kichuunta.

Ningakon en na ndo Jesús ko sen titikaon ndo

18 *Siá ni nunte xasintajni toña o anta, no anta ixi jan an ningakonna na sa ó.

19 Siá ja anta xrokjuinta chujni nunte xasintajni, ni nunte xasintajni xrotjua anta na ixi xrakichuunta na. Ko jan an kuincha anta ngakjen en ni nunte xasintajni. Ko méxin, ni nunte xasintajni ningakon annta na ixi í je anta chujni nunte xasintajninta.

20 *Xraxaonnta nge e ntatjunta ixi ni naa xi nche e ixra tetuan an ícha ixi xi xrée. Siá ningakonna na ko rua na na, jaña xrorua anta na kaxon. Ko siá kuitikaon na nge e juntakuan an na, me e kaxon tsitikaonnta na nge e tsjako enta na.

21 Kain jii sinta anta nã kondeexin jan anixi titikaonntana koixi chũxin a nã ngisen xruan annajui i.

22 Siã xrojui antii ko xronichja i ngajin nã, je e nã xrochõnda i nã ninaa ijie. Ko jai jua i xron-dachro nãixi noe a nã ko chõnda i nã ijie.

23 Ni ningakonna, ni me e ningakon en nã Ndotána kaxon.

24 Je e nã xrochõnda i nã ijie siã xrojuinta i nge e ti ninaa ngisen juinche e sa ó. Ko jai ó bikon nã kain nge e junta a, ko maski bikon nã, ningakonna nã ko kaxon ningakon en nã Ndotána.

25 Ko jaña ton enixi xrokonda tson en nge e ndachro ley ne e nã: “Ningakonna nã maski xro an ijie chonda.”

26 Ko nchakon tsii ngisen tsingijna, me e Espíritue ndo Dio nduaxin, xroxruan an jan anixi juachaxien Ndotána ko je e ndo xronichjaxinna ndo.

27 Ko ja anta kaxon xronichjaxinntanaixi ngajin ritjennta xraxrangixi xión juako anta.

16

1 Kain jii ntatjuntaixi tsintue anta nge e juin-takuan anna.

2 Ni judío tsajon a nã juachaxin tsixin innta ni ngo ko tsiji nchakonixi ni naatsõñaxõnnta xrox-raxaon nãixi tinche e nã me e naa xrée ndo Dio.

3 Jaña sinche e nãixi chũxin a nã Ndotána ko chũxin a nã najan an.

4 Ko ntatjunta kain jiiixi nchakon jaña tson en, xroxraxaonntaixi ó ntatjunta sa ó jaña tson en.

Ixrã nche e Espíritue ndo Dio

'Ti xrangíxixión ntatju inta ji i xixi bake e ngajinta.

⁵ Ko jai satsji ti jii ngisen xruan anna jui i. Ko ninaánta tjanhangínta no satsji

⁶ xixi tsango jitoní e asáanta xixi ntatjunta kain ji i.

⁷ Nduaxin, cháña satsji xixi ja anta jian tsake enta. Ko siá satsji a tsi a ngisen tsingijnanta. Ko siá satsji, jan an xroxruan an ndo tsii ndo.

⁸ Ko nchakon tsii ndo sinchexraxaon ndo chujni nunte xasintajni xixi chón_{da} n_a ijie, ko jii naa cha o ndako xrorué e n_a ko ndo Dio sinchéñe e ndo n_a ijie.

⁹ Je e n_a chón_{da} n_a ijie xixi titikaon a n_a

¹⁰ ko tsono e n_a xixi jii naa cha o jian ko xixi jan an satsji ti jii Ndotána ko ítsikon antana,

¹¹ ko tsono e n_a xixi ndo Dio sinchéña ndo ijie xixi ó juexin juinchéña ndo ijie ngajin Xixron anxrée, xi tituen en nunte xasintajni.

¹² 'Xrarichonda itsjé nge e xrontatjunta, ko jai jua i tsienxinnta.

¹³ Nchakon tsii Espíritue ndo Dio nduaxin, je e ndo sintakuan annta ndo kain nge e nduaxin xixi je a nge e tjaun ndo xrontatjunta ndo. Na i. Xrontatjunta ndo kain nge e tsin en ndo ko sintano anta ndo nge e tson en.

¹⁴ Je e ndo tsajon ndo juasaya ngajin jan an xixi tsayé e ndo kain chijnina ko nge e tikinixinna ko sintano anta ndo kain ji i.

¹⁵ Kain nge e chón_{da} Ndotána na na kaxon. Méxin, ndachrjan xixi Espíritue ndo Dio tsayé e ndo nge e tikinixinna ko tjume e sintano anta ndo kain ji i.

Ti toni e aséenni xrokjan juaxruxin

¹⁶ 'Xra íse a í tsikon antana. Ko kaxon íse a tsikonntana íjngo ixi satsji ti jii Ndotána.

¹⁷ Ko kaxin sen chrikao ndo ndache kichuu sen:

—¿Nge e xrondachro ji i ixi íse a tsikonna ndo ko kaxon sé a tsikonna ndo íjngo ixi satsji ndo ti jii Ndotée ndo?

¹⁸ ¿Inge e tjaun ndo xrondachro ndo ixi: “íse a”? Tianxin ana nge e ndachro ndo.

¹⁹ Ko kono e ndo Jesús nge e tjaun sen tsjan-changí e sen ndo ko ndache ndo sen:

—Jan an ntatjunta ixi íse a ítsikon antana ko kaxon sé a tsikonntana íjngo. ¿Á ji i ritjanchiangí e kichuunta?

²⁰ Nduaxin ntatjunta ixi tsango xrotsjanganta ko tsoni e asáanta, ko ni nunte xasintajni tsake e na juaxruxin. Ko maski tsango tsoni e asáanta ko tjume e xrokjan tsake enta juaxruxin.

²¹ Hora naa nchri sinchejongí e nchra chjen en nchra, tsango tsoni e aséen nchra ixi ó kuiji hora tsjongí e xjan. Ko tjexin tjongí e xjan, tjume e ísintexi añao nchra juachjaon kuatsinga nchra ixi juaxruxin take e nchra ixi juinchejongí e nchra naa chjan ngata a nunte xasintajni.

²² Jaña ja anta kaxon toni e asáanta jai. Ko tjume e tsikonntana íjngo ko tsango tsake e juaxruxin asáanta ko ninaa chujni tsantsja anta juaxruxin me e.

²³ 'Nchakon me e xro an nge e tsjanchangínanta. Nduaxin nge e ntatjunta. Ixi Ndotána xrotjáanta ndo kain nge e tsjanxaxinnta nombréena.

²⁴ Ja anta xraxro an nge e tjanchiixinnta nombréna jai. Ko jai tjanchianta ko tsaye enta, ko tsango tsake enta juaxruxin.

Ncháina Jesucristo juacha ndo kuetuan an ndo nunte xasintajni

²⁵ 'Ntatjunta ji i je o xranchi tekini naa nge e. Ko tsii nchakon ítsekia inta jaña ixi ndako xrontatjunta ixi Ndotána.

²⁶ Nchakon me e tsjanchiixinnta nge e nombréna. Ko ndachrjan i ixi jan an xronichjixinnta ngajin Ndotána

²⁷ ixi je e Ndotána tjua anta ndo. Tjua anta ndo ixi ja anta tjuananta jan an ko ixi titikaonnta ixi jan an juixin ti jii je e ndo.

²⁸ Kuachrjexin ti jii Ndotána ixi jui i nunte xasintajni. Ko jai tintu a nunte xasintajni ixi satsji ti jii Ndotána íjngo.

²⁹ Tjume e ndachro sen chrikao ndo:

—Jai ndako ritjakua ko ítjakoxin a ixi xrojan chijni,

³⁰ jai tienxinna ixi no a kain nge e ko xrokonda i ixi xrojan ngisen tsjanchangi ana. Méxin, titika onna ixi ja a juixian ti jii ndo Dio.

³¹ Ndo Jesús juate e ndo:

—¿Jai ché kuitikaonnta?

³² Ko tsii nchakon ko jai hora me e ixi ja anta xrochjeyanta ko satsjinta ko tsintunantana jan on. Ko je a jan on ritjén ixi Ndotána jii ndo ngajin.

³³ Ji i ntatjunta ixi kainnta juaxruxin tsake e asáanta ixi titikaonntana. Ko nti i nunte xasintajni tsatsinganta juachjaon, ko xronka inta ixi jan an ó juacha tetuan an nunte nti i.

17

Ndo Jesús tjanchia ndo ixi sen chrikao ndo

¹ Ó juexin ndachro ndo Jesús kain ji i, tjume e tsje e ndo ngajní ko ndachro ndo:

—Ndotána, ó kuiji nchakon. Chje énta Chjan anta juachaxin ixi kaxon Chjan anta xrotjáanta xjan juasaya.

² Ko ja anta chje énta Chjan anta juachaxin ixi tsetuen en xjan kain chujni ko tsajon xjan juachaxin tsechón sen kain nchakon, kain sen tsichje enta xjan.

³ Ko juachaxin chóna sen tsechón sen kain nchakon me e ti xrochuxinnta sen ja anta, ndo naakua ndo Dio nduaxin jichón, ko kaxon xrochuxin sen ndo Jesucristo, ndo tsixruan annta ja anta nunte xasintajni.

⁴ Jan an tjá anta juasaya nti i nunte xasintajni ko juexin junta a ixra kuetuannanta.

⁵ Ko jai Ndotána, chjánanta juachaxin ijié xranchi kuachonda jan an nchakon bake e ngajinnta ti xrako a nunte xasintajni.

⁶ Ó juinteno a sen chjánanta, sen nunte xasintajni, sen tsikinche e ja anta. Je e sen chujnianta sen ko ja anta chjánanta sen ko jan an ó juintakuan an sen chijnianta ko kuitikaon sen.

⁷ Ko jai ó no e sen ixi kain juachaxin chóna jan an t̄i x̄in ngajinnta.

⁸ Jui i ixi juako a sen chijnianta chjánanta, ko je e sen kuitikaon sen, ko kuienxin sen ixi nduaxin jan an juixin ngajinnta, ko kuitikaon sen ixi ja anta tsixruan annanta.

⁹ 'Jan an tjanča anta ixi tsingijnanta sen me e. Je a tjanča anta ixi tsingijnanta kain chujni nunte xasintajni. Na i. Je o tjanča anta ixi sen chjánanta ko ixi je e sen chujnianta sen.

¹⁰ Ko kain nge e chonda ja anta, na na, ko kain nge e na na, na anta kaxon. Ko méxin, je e sen tsajon sen juasaya ngajin.

¹¹ 'Jai ítsituna i nti i nunte xasintajni. Ko je e sen xratsitu e sen nti i. Ko jan an satsji ixi tsake e ngajinnta. Ndotána jian, tayakon ennta ixi juachaxiannta sen chjánanta ixi je e sen naakua tsake e sen xranchi jan an ko ja anta naakua stena.

¹² *Nchakon bake e ngajin sen nti i nunte xasintajni, kuayakon an sen ixi juachaxiannta. Ko ninaa sen kuitjáña i sen. Je o naakua naa ngisen kuitjáña, ixi xi me e ó tsikitjáña xa ixi jaña tson en xranchi jitaxin xroon tsikjin sen sa ó.

¹³ 'Ko jai satsji ti no ritjennta. Ko ixi xraritjén nti i nunte xasintajni ndachrjan ji i ixi tsake e sen juaxruxin xranchi juaxruxin chóna jan an.

¹⁴ Jan an juentakuan an sen chijnianta, ko jai ni nunte xasintajni ningakon en na sen ixi je e sen je a chujni nunte xasintajni xranchi jan an kaxon je a chujni nunte xasintajni.

¹⁵ Tjánchá ianta ixi tsantsjexinnta sen nunte xasintajni. Na i. Tjanča anta ixi tsingijnanta sen ixi Xixron anxrée sincheye a xa sen.

¹⁶ Xranchi jan an je a chujnie nunte xasintajni, kaxon je e sen je a chujni nunte xasintajni sen.

¹⁷ Nchetjúáxinnta sen ixi nge e nduaxin ixi chijnianta chijni nduaxin.

¹⁸ Xranchi xruan annanta jui i nunte xasintajni, jaña jan an xruan an sen itsji sen ngakjen en chujni nunte xasintajni.

¹⁹ Ixi je e sen totjúáxinna jan an, ko kaxon je e sen tsontjúáxin aséen sen ixi chijni nduaxin.

²⁰ 'Ko je a je o tinóatáana ixi je e sen. Na i. Kaxon tinóatáana ixi tsingijnanta sen tsitikaon ícha tjume e, nchakon tsin en sen nge e xronichja je e sen.

²¹ Tjanča anta ixi kain sen naakua xroxraxaon sen xranchi ja anta Ndotána ko jan an naakua stena, ixi kain chujni nunte xasintajni tsitikaon na ixi ja anta xruan annanta jui i.

²² Ó tjá a sen naxra je o juachaxin ijié xranchi juachaxin chjánanta ixi naakua xroxraxaon sen xranchi jan an ko ja anta naakua stena.

²³ Jan an ko je e sen naakuana xranchi ja anta ko jan an naakuana kaxon. Ko jaña chujni nunte xasintajni tsono e na ixi ja anta xruan annanta jui i ko kaxon tjue enta na xranchi tjaunnanta jan an.

²⁴ 'Ndotána, ja anta chjánanta sen, ko tja on ixi tsake e sen ti no tsake e jan an ixi tsikon sen juachaxin ijié chjánanta; ixi fiaonanta ti xrako a nunte xasintajni.

²⁵ Ndotána, tsango jian ja anta. Chujni nunte xasintajni chúxin a na ngisen ja anta, ko jan an ó chuxinnta, ko kain sen chjánanta, kaxon ó no e sen ixi ja anta xruan annanta jui i.

²⁶ Ó juntano a sen ngisen ja anta ko xrasintano a sen ícha, ixi xranchi ja anta tjaunnantana jaña xrotjue e kichuu sen ko jan an tsake e ngajin sen.

18

Itsé na ndo Jesús ko bije e na ndo

(Mt. 26:47-56; Mr. 14:43-50; Lc. 22:47-53)

¹ Juexin ndachro ndo Jesús kain ji i, tjume e kuachrjenka o ndo sen chrikao ndo ko sakjui sen kuationda Cedrón. Nti a jii naa ijngi ko nti a ikjui ndo Jesús ko sen chrikao ndo.

² Kaxon xi Judas, xi juinчекji ndo Jesús, chúxin xa ijngi me e ixí nti a itsjé nchakon baxraka sen chrikao ndo Jesús ko kao je e ndo.

³ Méxin, xi Judas bika o xa kueya xi soldado ko kaxin xi policía nche e xra ni ngo tsixrua an xitaana tetuan an ko xi fariseo. Kuijikao na chika ko xro i tingasáñaxin.

⁴ Ko ndo Jesús ó no e ndo kain nge e xrokon en ndo, ko konchjiñe e ndo ngajin na ko juanchangi e ndo na:

—¿Ngisen tjéenta?

⁵ Ko juate e na:

—Tjéena xi Jesús, xi tjajna Nazaret.

Ko juate e ndo Jesús:

—Jan anna.

Ko xi Judas, xi tsijinчекji ndo, nti a jikao xa na.

⁶ Ko hora ndachro ndo Jesús: “Jan anna”, je e na xronka na ko ngaxiton na kuitsinga na nunte.

⁷ Ko íjngo ikjan ndo Jesús juanchangi e ndo na:

—¿Ngisen tjéenta?

Ko je e na ndachro na:

—Tjéena xi Jesús, xi tjajna Nazaret.

⁸ Ko ndachro ndo Jesús:

—Ntatjunta jan an ngisen tjéenta. Ko siá jan an ngisen tjéenta, tintu enta satsji sen chrijiki an.

⁹ Jaña ndachro ndo Jesús ixi xrokonda tson en ti nge e tsindachro ndo: “Sen chjána Ndotána, xro an ngisen tsitjáña.”

¹⁰ Ko ndo Simón Pedro kuantsje ndo naa chika espada konchrijinxin ndo ndatsjon naa xi, ndatsjon xa ti jian, xi me e ndatin in xa Malco, xinchexrée xitaana tetuan an.

¹¹ *Ko ndo Jesús ndache ndo ndo Pedro:

—Xraxi ian chika espada ña. Siá Ndotána kuetuan an ixi tangi tsatsinga, xrokonda tsatsinga jan an kain ji i.

*Ndo Jesús ikjui ndo ngajin xi tetuen en xitaana
(Mt. 26:57-58; Mr. 14:53-54; Lc. 22:54)*

¹² Tjume e xi soldado ko xi tetuen en xa ko xi policía judío nche e xra ni ngo itsé xa ndo Jesús ko kuintee xa ndo.

¹³ Ko sabikao xa ndo ndo a xi Anás, a xi Anás xichéé xi Caifás, ngisen nano me e tituen en xitaana.

¹⁴ *Ko xi Caifás, xraje o je e xa tsindache ni judío ixi ícha jian naakua naa chujni xrokuenxin ixi tjajnéé na.

*Ndo Pedro ndachro ndo chúxin a ndo ndo Jesús
(Mt. 26:69-70; Mr. 14:66-68; Lc. 22:55-57)*

¹⁵ Ndo Simón Pedro ko inaa ndo bakajikao ndo Jesús sterué e sen ndo. A ndo inaa ó chúxin ndo xitaana tituan an. Méxin, kaxon kuixin in ndo no kuixin in ndo Jesús, ngaxin in ndasin ndo a xitaana tituan an.

¹⁶ Ko ndo Pedro kuitu e ndo nduja ti ntachja. Ko ndo chúxin xitaana tituan an kuachrje ndo ko

nichje e ndo nchri tendáa ntachja ko kuajon nchra juachaxin kuixin in ndo Pedro.

¹⁷ Tjume e nchri tendáa ntachja juanchangi e nchra ndo Pedro:

—¿Á kaxon ja a chriku a xi ña?

Ko juate e ndo Pedro ndachro ndo:

—Na i, jan an na i.

¹⁸ Ko nti a tsango ikin ko xi nche e ixra ko xi policia juaaka xa naa xro i nti a ko siin xa stexraxru e xa. Kaxon ndo Pedro jixraxru e ndo nti a.

Xitaana tetuan an tjanchangí e xa ndo Jesús
(Mt. 26:59-66; Mr. 14:55-64; Lc. 22:66-71)

¹⁹ Ko xitaana tetuan an juangixin xa juanchangi e xa ndo Jesús ngisen sen chrikao ndo ko nge e tjako ndo.

²⁰ Ko juate e ndo Jesús:

—Jan an nichja ngajinxin ikon kain ni nunte xasintajni, ko bajako ngaxin in nchia ko ngaxin in ni ngo ti no baxra o kain ni judío. Ko xro an nge e ndachrjan imao.

²¹ ¿Sonda tjanchanginana? Tjanchangí e ni kuin en xranchi tjako. Je e na no e na nge e ndachrjan.

²² Juexin ndachro ndo Jesús jii, tjume e naa xi policia nche e xra ni ngo, jindaxin xa nti a, kuande e xa naa iton ikon ndo Jesús ko ndachro xa:

—¿Á jaña tjate é ngajin xi tituen en xitaana?

²³ Ko juate e ndo Jesús:

—Siá ndako a ndachrjan naa nge e, ndachijiana nge e ndako a ndachrjan, ko siá ndako nge e ndachrjan, ¿sonda kon iana?

24 Tjume e xi Anás xruan an xa ndo Jesús jixrite e ndo ngajin xi Caifás, xitaana tetuan an.

Ndo Pedro íjngo ndachro ndo chúxin a ndo ndo Jesús

(Mt. 26:71-75; Mr. 14:69-72; Lc. 22:58-62)

25 Ko ndo Pedro xراسiin ndo nti a jixraxru e ndo, ndache na ndo:

—¿Á kaxon ja a chriku a xi ña?

Ko ndo Pedro ndachro ndo chúxin a ndo ndo Jesús, méxin, ja in juate e ndo:

—Na i, jan an na i.

26 Tjume e naa xi nche e xrée xitaana tetuan an, xi me e xrakichuu xa xi tsikonchrijin ndo Pedro ndatsjon, juanchangi xa:

—¿Á je a ja a bikon riku a xa ti jii ijngi chóna lahuerta?

27 Ko ndo Pedro ndachro ndo íjngo je a ndo. Ko tuinxin itsje naa kuntaxichíká.

Ndo Jesús ngajin xi Pilato

(Mt. 27:1-2, 11-14; Mr. 15:1-5; Lc. 23:1-5)

28 Kuachrxexin na ndo a xi Caifás, sabikao na ndo Jesús ti nchia ijie tetuanxin xi gobernador. Ko ó kuaxi jitingasáña ko ni judío kuixin a na nchia me e ixi jaña xrokuama i na ijie, ne jua i sine na kia Pascua.

29 Tjume e xi Pilato kuachrxexin xa nchia tetuan an na, juanchangi e xa na:

—¿Nge e ijie chóna xi ji i?

30 Ko je e na juate e na:

—Siá je a ndako a juinche e xa, xrobikian ina xi nti i.

31 Ko ndache xi Pilato na:

—Satiku unta xa, nchéñe enta xa ije xranchi jitaxin ley na anta.

Ko juate e ni judío:

—Jan anna judíona chonda ina juachaxin naat-sóñaxónna naa ngisen.

³² *Jaña kon en xranchi tsindachro ndo Jesús xranchi tsen en ndo.

³³ Tjume e xi Pilato íjngo kuixin in xa nchia tetuanxin xa ko kuiye e xa ndo Jesús ko juanchangi e xa ndo:

—¿Á ja a xi Rey tetuen en ni judío?

³⁴ Ko ndachro ndo Jesús:

—Ti nge e tjanchanginana, ¿á ja ua xraxoan jaña?, o, ¿á ixi inaa na jaña ndachro na?

³⁵ Ko juate e xi Pilato:

—¿Á jan an judíona? Ni tjajnáa ko xitaana tetuan an bikaan na ngajin. ¿Nge e juinche e?

³⁶ Ko juate e ndo Jesús:

—Juachaxin chóna jan an je a kujxin nunte xasintajni. Siá xrokujxin nunte xasintajni, sen chrijiki an xrojuinche e sen nge e ixi xrotsé ana ni judío ko juachaxin chóna jan an, je a juachaxin nunte xasintajni.

³⁷ Ko ndachro xi Pilato:

—Ja a, ¿á nduaxin naa xi rey?

Ko juate e ndo Jesús:

—Jaán, jan an rey xranchi ja a ndachrua. Jan an jui i nunte xasintajni ixi xronichja ti nduaxin. Kain sen titikaon nge e nduaxin, sen me e tin en nge e tjako.

³⁸ Ko ndachro xi Pilato:

—¿Nge e nduaxin ndako, ndachrua?

*Xi Pilato kuajon xa juachaxin tsen en ndo Jesús
(Mt. 27:15-31; Mr. 15:6-20; Lc. 23:13-25)*

Ko juexin juanchangi xi Pilato ji i, tjume e kuachrje xa ko ikjui xa ti ste ni judío, ko ndache xa na:

—Kuitja i ninaa ijię ngajin xi ji i.

³⁹ Ko ja anta ó xrakun anta ixi kia pascua tajanda naa chujni jije e. ¿Á tjaunnta tsajanda xi Rey tetuen en ni judío?

⁴⁰ Ko kain na kuyako na ndachro na:

—Xi ña na i. Tajanda xi Barrabás.

Ko xi Barrabás naa xiche e me e.

19

¹ Tjume e xi Pilato kuetuan an xa ixi tsjaya na ngajin ndo Jesús.

² Ko ni soldado juinchéña na ixi ntacha a naa corona ko bake e na ngata a jaa ndo Jesús. Ko juinchekeya na ndo naa manta tiie játse.

³ Ko konchjiñe e na ti jii ndo, ko ndachro na:

—Tsechón ndo rey tetuen en ni judío.

Ko juanoa na ndo. Ko itja na kuandexin na ikon ndo.

⁴ Ko xi Pilato íjngo kuachrjexin xa nchia tetuanxin xa, ko ndache xa ni tsixra o nti a:

—Tsje enta, tsantsje xa ixi tsienxinnta ixi kuitja i ninaa nge e ndako a juinche e xa.

⁵ Ko kuachrjexin ndo Jesús nti a jitikao ndo ngata a jaa ndo corona tsikoña ntacha a ko jitsáa ndo manta tiie játse. Ko ndachro xi Pilato:

—Tsje enta, nti i jii xa.

⁶ Ko nchakon bikon ni taana tetuan an ko ni policia ne e ni ngo juangíxin na kuyako na:

—¡Tjankanitua xa ntacru! ¡Tjankanitua xa ntacru!

Ko ndachro xi Pilato:

—Ja anta tiku unta xa ko tankanitonta xa ntacru ixi jan an kuitja i ninaa nge e ndako a ngajin xa.

⁷ Ko juate e ni judío:

—Jan anna chondana naa ley xrokonda tsen en xa ixi ndachro xa ixi Chjen en ndo Dio je e xa.

⁸ Ko nchakon kuin en xi Pilato ji i ícha xronka xa.

⁹ Tjume e íjngo kuixin in xa nchia tetuanxin xa ko juanchangi e xa ndo Jesús:

—¿No juixian?

Ko ndo Jesús xro an nge e juate e ndo.

¹⁰ Ko ndachro xi Pilato:

—¿Sonda tjatée a? ¿Á noa ia ixi jan an chonda juachaxin tsetuan an nã tankanitua nã ntacru o kaxon chonda juachaxin tsajanda satsjia ko xro an nge e tson an?

¹¹ Ko juate e ndo Jesús:

—Xro an juachaxin chónða ja a siá je a Ndotána Dio xrotjáa ndo juachaxin. Ko chujni bikaana nti i ícha ijie chónða nã ixi ja a.

¹² Ko kuin en xi Pilato ji i, tjume e juangíxin xa juée xa xranchi xrobajanda xa ndo Jesús. Ko ni judío kuyako nã ndachro nã:

—Siá tsintu é satsji xa, ja a je a tjentua xi tetuen en tñajnaína. Ngisen nchéña aséen xranchi naa rey, ni me e ningakon en xa xi tituaína.

¹³ Kuin en xi Pilato ji i, tjume e sabikao xa ndo Jesús nduja ko bake e xa nunte ti no nchéñaxin nã ijie ko kaxon nchekin in nã ti kueya ixro ko ngigua aremeo xrondachro Gabatá.

¹⁴ Nchakon me e naa nchakon sa ó kia Pascua, ko ó xrochjée ngusine nchakon ko xi Pilato ndache xa ni judío:

—Nti i jii xi rey tetuan annta.

¹⁵ Ko je e n̄a kuyako n̄a ndachro n̄a:

—Tsachrje xa, tsachrje xa. Tankanitia xa nt̄acru.

Ko xi Pilato ndachro xa:

—¿Á tjaunnta tsjankanito xa nt̄acru xi rey tituan annta?

Ko je e n̄a juate e n̄a:

—Xro an xi rey chondana, je o xi César tituan an.

¹⁶ Méxin, xi Pilato kuajon xa ndo Jesús ngajin ni judío ko sabikao n̄a ndo tsjankanito n̄a ndo nt̄acru.

Juankanito n̄a ndo Jesús nt̄acru

(Mt. 27:32-44; Mr. 15:21-32; Lc. 23:26-43)

¹⁷ Jaña ndo Jesús kuachrjexin ndo nti a yama ndo nt̄acru ti no tsjankanito n̄a ndo, noxon cha o itji ti no tin in ntajaa chujni ko ngigua arameo xrondachro Gólgota.

¹⁸ Nti a juankanito n̄a ndo nt̄acru, ko kaxon íjngo yuu xi, naa xi bake e xa ndatsjonxin jian ko inaa xa ndatsjonxin kjon ko ngusine bake e n̄a ndo Jesús.

¹⁹ Ko kuetuan an xi Pilato xrokjin n̄a ngata a naa nt̄aa ko tsake e n̄a ti noi nt̄acru ko xrondachro nt̄aa:

“Ndo Jesús, ndo tjajna Nazaret, me e ndo Rey tetuen en ni judío.”

²⁰ Ko itsjé ni judío juinchekuanxin n̄a letra tsikoña ixi tjenka tjajna Jerusalén kuenito n̄a ndo Jesús nganito nt̄acru ko ní téé tjajna tsikjin n̄a, naa téé hebreo, naa téé griego, naa téé latín.

²¹ Ko ni taana tetuan an ni judío ndache n̄a xi Pilato:

—Kjin a ja a je e xa “xi Rey tetuen en ni judío”; cháña ikjian “Je e xa ndachro xa ixi je e xa xi Rey tetuen en ni judío.”

²² Ko juate e xi Pilato:

—Ti kuetuan an xrokjin n̄a ó juexin kóña, ko jaña tsitu e.

²³ Tjume e ni soldado, hora juexin bake e n̄a ndo Jesús nganito nt̄acru, kua n̄a mantée ndo Jesús, konchjeya n̄a manta ko noó juinchéña n̄a manta nanaá mantée n̄a. Ko kaxon kua n̄a manta jine jiá ndo. Manta me e tsixraun a manta, naakua manta tsikoña me e.

²⁴ Ko ni soldado juao kichuu n̄a ndachro n̄a:

—Xrochjeya ina manta jii. Ícha jian xroson-daoxina ixro ixi jaña tsonojina ngisen tsjacha manta.

Jaña kon en xranchi ndachro xroon chijnie ndo Dio tsikjin sen sa ó: “Sondaonxin n̄a ixro ko jaña chjeye e n̄a mantána.” Jaña juinche e ni soldado.

²⁵ Ko tjenka nt̄acru ti no jinito ndo Jesús bake e janée ndo ko jan kichuu jan, jan María, janchri e ndo Cleofas ko jan María Magdalena.

²⁶ Ko nchakon bikon ndo Jesús janée ndo ko tjenka jan jii ndo chrikao ndo, ndo ícha tjue e ndo, ndache ndo janée ndo:

—Tsje é nti i jii chjan an.

²⁷ Ko tjume e nichje e ndo Jesús ndo bajikao ndo, ndo jii tjenka jan, ko ndachro ndo:

—Nti i jii janáa.

Ko ndo me e kuayé e ndo jan, sabikao ndo jan ndo a ndo ko je e jan ikjan jan xranchi janée ndo.

Kuen en ndo Jesús

(Mt. 27:45-56; Mr. 15:33-41; Lc. 23:44-49)

²⁸ Ó no e ndo Jesús ixi kain ixra ó juexin juinche e ndo ko xrokonda tson en nge e jitaxin xroon ko ndachro ndo:

—Kuen enna inda.

²⁹ Ko nti a jii naa chikute jitjiá xran tsjá ko je e na juinchetjao na naa tu o manta kuintsiá na naa ntaa ko bake e na tjenka ro a ndo.

³⁰ Ko ndo Jesús kui i ndo xran tsjá ko ndachro ndo:

—Ó juexin junta a kain nge e kuituanna.

Tjume e kuisée jaa ndo ko kuajon ndo espíritue ndo ko ndakuen en ndo.

³¹ Nchakon me e naa nchakon sa ó kia Pascua, méxin, ni judío tjaun a na xrokuitu e cuerpoe ni tsiken en nganito ntacru nchakon tjoké e na, ixi nchakon me e naa nchakon ijié. Méxin, juanche e na xi Pilato tsondaki na tutée ni kuen en nganito ntacru ko satsikaoxin na nti a cuerpoe ni me e.

³² Ko ni soldado ikjui na ko kondaki na tutée naa xi ko kao tutée xi yuxin juankanito na ntacru tjenka ndo Jesús.

³³ Ko hora kuiji na tjenka ndo Jesús ko bikon na ó tsiken en ndo, kondaki a na tutée ndo.

³⁴ Ko naa xi soldado kuantje e xa ndatsjonxin ntakuin ndo Jesús ixi naa chika ko tuinxin chrinka ijni ko inda.

³⁵ Méxin, jan an rikjin xroon ixi bake é nti a, bikon ixi jaña kon en ko ndachrjan ti nduaxin ixi ja anta kaxon tsitikaonnta.

³⁶ Jaña kon en ji i xixi tson en nge e ndachro xroon chijnie ndo Dio tsikjin sen: “Tsondaki a na ninaa nte e ndo.”

³⁷ *Kaxon íjngo nichja xroon chijnie ndo Dio tsikjin na sa ó ndachro: “Xrotsje e na ndo juinchekatsingato e na chika ndatsjonxin ntakuin ndo.”

Xrabaa ndo Jesús

(Mt. 27:57-61; Mr. 15:42-47; Lc. 23:50-56)

³⁸ Tjume e ó juexin kon en kain ji i, ko ndo José, naa ndo tjajna Arimatea, juanchia ndo ngajin xi Pilato juachaxin xixi tsakinjinxin ndo ntacru cuerpoe ndo Jesús ko satsikao ndo ndo xroxrabaa ndo. Je e ndo José imao rué e ndo ndo Jesús xixi xrakon en ndo ni judío. Tjume e xi Pilato kuajon xa juachaxin ko sabikao ndo José cuerpoe ndo Jesús.

³⁹ *Kaxon ndo Nicodemo, ndo me e bikitsje e ndo Jesús naa tiie, a nchakon xroxrabaa ndo Jesús bika o ndo níite kilo xroan xraxe tsintekjan xroan mirra ko xroan áloe.

⁴⁰ Jaña ndo José ko ndo Nicodemo kuayé e sen cuerpoe ndo Jesús, juinchekitsa sen ndo naa manta jine tsikaa xroan xraxe xixi jaña bakitikaon ni judío nchakon tsixrabaa chujni tsiken en.

⁴¹ Ti no juankanito na ndo Jesús ntacru tjenka nti a jii naa huerto ko nti a jii naa itjaõ natjúá xraxro an chujni tsixrabaa nti a.

⁴² Nti a juabaa sen ndo Jesús xixi kjín a jii itjaõ* ko íse a hora xroxrangíxin nchakon tjoké e ni judío.

20

Xechón ndo Jesús

(Mt. 28:1-10; Mr. 16:1-8; Lc. 24:1-12)

¹ Tjume e nchakon xrangíxin semana xra naxixe e jan María Magdalena ikjui jan ti no tsixrabaa ndo Jesús, ko bikon jan ixi ixro tsijijeexin nā itjao* ti no tsixrabaa ndo tsijinchetengi nā ixro.

² Méxin sabinga jan ikjui jan ti no jii ndo Simón Pedro ko ti jii inaa ndo tsikinche e ndo Jesús, ndo me e tsango tjue e ndo ndo Jesús, ko ndachro jan:

—Ó tsikantsje nā cuerpoe Ncháina satsikikao nā ndo ko nóna ina ti no tsikake e nā ndo.

³ Ndo Pedro ko ndo me e kuin en sen jaña, méxin, sakjui sen ti tsixrabaa ndo Jesús.

⁴ Yui sen binga sen. Ko ndo naa ícha nteeto binga ndo ixi ndo Pedro, ko je e ndo sa ó kuiji ndo tinó tsixrabaa ndo Jesús.

⁵ Kuisée ndo tsje e ndo ngaxin in ti no tsixrabaa ndo Jesús ko bikon ndo manta tsikitsía nā ndo ko kuixin a ndo nti a.

⁶ Ko tjume e kuiji ndo Simón Pedro ko kuixin in ndo ti no tsixrabaa ndo Jesús ko kaxon bikon ndo manta tsikitsía ndo,

⁷ ko bikon ndo ixi manta tsikitsía jaa ndo Jesús nango tsixratu u manta, ji a manta tjenka ti no ste manta kaxin.

⁸ Ko ndo bajikao ndo Jesús, ndo kuiji sa ó ti no tsixrabaa ndo, kaxon kuixin in ndo ko bikon ndo nge e tsikon en ko kuitikaon ndo.

⁹ Ko xrakuienxin a sen nge e ndachro xroon chijnie ndo Dio, ti xrokonda xroxechón ndo Jesús.

* **20:1** *Itjao* cueva

¹⁰ Tjume e sen tsikji tsikitsjexin ti no tsixrabaa ndo Jesús ikjan sen ndo a sen.

Ndo Jesús konoxin ndo ngajin jan María Magdalena

(Mr. 16:9-11)

¹¹ Ko jan María kuitu e jan ngandangi nduja ti no juabaa na ndo Jesús jitsjanga jan. Ko jaña jitsjanga jan, kuisée jan tsje e jan ngaxin in ti no tsixrabaa ndo,

¹² ko bikon jan yuu sen ángel jiá sen manta tjúa ste sen nunte tinó tsikake e na cuerpoe ndo Jesús ko naa ndo ángel jii ndo ti no bake e jaa ndo Jesús ko inaa ndo jii ndo ti bake e tutée ndo.

¹³ Tjume e sen ángel juanchangi sen:

—Nchri, ¿sonda tsjanga?

Ko juate e jan:

—Satsikikao na cuerpoe Nchána, ko nóna ina no tsikake e na ndo.

¹⁴ Juexin ndachro jan ji i ko konkjan jan tsje e jan ko bikon jan ixi nti a jii ndo Jesús, ko juatsuan i jan ndo.

¹⁵ Ko ndo Jesús juanchangi e ndo jan:

—Nchri, ¿sonda tsjanga? ¿Ngisen tjée?

Ko je e jan xraxaon jan ixi ndo nichje e jan naa sen tayakon en huerto nti a, ko ndachro jan:

—Síá ja a sabiko a ndo, ndachijiana no bakée ndo ixi jan an satsiki an ndo.

¹⁶ Ko ndo Jesús nichje e ndo jan ndachro ndo:

—¡María!

Ko tsje e jan ndo, ko nichjxin jan ngigua arameo, ndachro jan:

—¡Raboni!

(Ji i xrondachro Maestro.)

17 Ko ndachro ndo Jesús:

—Tajandana ixi xrasatji a ti jii Ndotána. Itjia titsje é sen kichuuna ko ndache sen ixi sajiin ti jii Ndotána, ndo kaxon Ndotánta, ndo Dio na na ko kaxon ndo Dio na anta.

18 Tjume e jan María Magdalena sakjuichronga jan ngajin sen kuajikao ndo Jesús, ko ndachro jan ixi tsikikon jan Ncháina ko kaxon chronga jan ixi jaña tsindachro ndo.

Ndo Jesús konoxin ndo ngajin sen kuakuajikao ndo

(Mt. 28:16-20; Mr. 16:14-18; Lc. 24:36-49)

19 Tjume e kóndo nchakon xrangíxin semana, sen kuajikao ndo Jesús tsixra o sen ngaxin in nchia ko jian tsikije e sen nchia ixi xrakon en sen ni judío. Ko ndo Jesús kuixin in ndo ko ngusine je e sen bake e ndo, ko nichje e ndo sen, ndachro ndo:

—¿Á jian stenta?

20 Ko juexin ndachro ndo ji i, juako ndo itja ndo ko chjiyéé ndo. Ko je e sen bake e sen juaxruxin ixi bikon sen Ncháina.

21 Tjume e ndachro ndo Jesús:

—Juaxruxin stenta. Xranchi Ndotána xruan anna ndo jui i nti i, jaña jan an xruan annta.

22 Ko kuanotée ndo ngata a sen ko ndachro ndo:

—Taye énta Espíritue ndo Dio.

23 *Siá xrotjáña anta ijié juinche e xrojan ngisen, jaña kaxon tsomé e jíee nã. Ko siá xrotjáña inta ijié juinche e xrojan ngisen, tsomé a ijié chónda nã.

Ndo Tomás bikon ndo ixi tsixechón Ncháina

²⁴ Tjume e ndo Tomás, naa sen teyuu sen chrikao ndo Jesús, kaxon nchekin in sen ndo xjan Kuatsi, ndo me e ko a ndo nchakon konoxin ndo Jesús.

²⁵ Méxin sen ikaxin chrikao ndo Jesús ndache sen ndo:

—Ó bikona Ncháina.

Ko ndachro ndo Tomás:

—Siá tsikon a jan an tinó tsikitu u na clavo itja ndo ko xroxraxon a dedo tjáana nti a ko ti chjiyéé ndo, tsitikaon a.

²⁶ Tjume e kuatsinga ijní nchakon ko xra o kain sen íngo ngaxin in nchia ko kaxon ndo Tomás jikao sen ndo nti a. Tsikije e sen jian nchia ko tuinxin bikon sen ndo Jesús ngusine ti ste sen ko nichja ndo ngajin sen ko ndachro ndo:

—¿Á juaxruxin stenta?

²⁷ Ko ndache ndo ndo Tomás:

—Xraxon ia dedo tjáa ti no tsixrandu u na chika clavo tjáana ko xraxon ia tjáa chiyéna. Ko jaña je a xrokuitikaon a ixi nduaxin jan an.

²⁸ Ko juate e ndo Tomás:

—Ja a Ncháina ko ndo Dio na na!

²⁹ Ko ndache ndo Jesús ndo Tomás:

—Tomás bikonjana, kuitikaoan. Ko ikaxin sen juaxruxin ste sen, maski bikon ana sen ko jaña titikaon sen.

Ji i chronga sonda tsikjin ndo Juan xroon ji i

³⁰ Ndo Jesús juinche e ndo itsjé ixra ijié bikon sen chrikao ndo ko jitaxin a kain nge e me e xroon ji i.

³¹ Ko nge e jitaxin xroon ji i, tsikixintaxin ixi tsitikaonnta ixi ndo Jesús me e ndo Cristo, Chjen en

ndo Dio, ixi siá tsitikaonnta ndo, xrochondanta juachaxin tsarichonnta kain nchakon.

21

Ndo Jesús konoxin ndo ngajin sen yaato bakajikao ndo

¹ Tjume e íjngo ndo Jesús konoxin ndo ngajin sen chrikao ndo ngande e ndachaon ndatin in Tiberias.

² Naakua ste sen, ndo Simón Pedro ko ndo Tomás, xi nchekin in sen xjan Kuatsi, ko ndo Natanael, xi tsiki xin tjajna Caná nunte Galilea, ko yuu chjen en ndo Zebedeo ko íjngo yuu sen bakajikao ndo Jesús.

³*Tjume e ndachro ndo Simón Pedro:

—Satsji xrotse kuchee.

Ko juate e sen:

—Kaxon jan anna itsjina.

Ko sakjui sen kuajin in sen naa ntabarco. Ko xro an kuchee itsé sen nchijí tiie.

⁴ Ko ó jitingasáña ko tuinxin bikon sen ndo Jesús ngande e ndachaon, ko juatsuan i sen ndo.

⁵ Ko juanchangi e ndo sen:

—Ja anta, ¿á xraxro an kuchee itsenta?

Ko juate e sen, ndachro sen:

—Xraxro an nge e.

⁶*Ko ndo Jesús ndache ndo sen:

—Tja ngangínta nocha a nango jian ntabarco ko xrotsénta ba.

Tjume e jaña juinche e sen, banka sen nocha a ko jua i kuantsjexin sen inda nocha a ixi kueya kuchee itsé sen.

⁷ Ko ndo ícha tjue e ndo Jesús ndache ndo ndo Pedro:

— ¡Ncháina ji i!

Ko kuin en ndo Simón Pedro ixi Ncháina, ko kuéyá ndo mantée ndo, manta jindatexin, ixi tsikantsje ndo manta ko juingi ndo inda.

⁸ Tjume e sen kaxin bajikao ndo Jesús kuiji sen ngande e ndachaon bijikao sen ntábarco jitingakjín nocha a chóna kucheeḡ ixi tsikjin sen xranchi naa ciento metro kjínxin ti no jii ngande e inda.

⁹ Tjume e kuiji sen ngande e inda ko xingajinxin sen ntábarco ko bikon sen xruitja tsiche xro i ko ngata a xruitja jii naa kucheeḡ ko nango jii nutja.

¹⁰ Tjume e ndo Jesús juanchia ndo:

—Tikuunta kaxin kucheeḡ sintenta.

¹¹ Ko ndo Simón Pedro kuajin in ndo ntábarco bingakjin ndo nocha a jitjinga itsjé kucheeḡ, naa ciento cincuenta ko ní ba. Ko maski kueya ba tsitsé sen tsichrindaon a nocha a.

¹² Tjume e ndachro ndo Jesús:

—Xrokuiinta, sintenta.

Tjume e ninaa sen juanchangi e sen ndo ngisen je e ndo ixi ó juatsuan sen ndo.

¹³ Ko konchjiñe e ndo Jesús ko kua ndo nutja chjée ndo sen ko jaña kuajon ndo kucheeḡ.

¹⁴ Ji i nínxin konoxin ndo Jesús ti tsixechón ndo.

Ndo Jesús nichja ndo ngajin ndo Simón Pedro

¹⁵ Juexin juine sen juanchangi e ndo Jesús ndo Simón Pedro:

—Ja a Simón, chjen en ndo Jonás, ¿á ícha tjauanna ixi sen ji i?

Ko juate e ndo Pedro:

—Jaán, Nchána, ó no anta ixi tjua anta.

Ko ndachro ndo Jesús:

—Siá nduaxin me e, tayakon én kutuchjonna.

¹⁶ Tjume e yuxin juanchangi ndo Jesús:

—Ja a Simón, chjen en ndo Jonás, ¿á tjauanna?

Ko juate e ndo Pedro:

—Nchána, ja anta no anta kain nge e, jan an ó no anta jan an tja onnta.

Ko ndachro ndo Jesús:

—Siá nduaxin me e, tayakon én kutuchjonna.

¹⁷ Tjume e nínxin juanchangi ndo Jesús:

—Ja a Simón, chjen en ndo Jonás, ¿á tjauanna?

Ko koni e aséen ndo Pedro ixi nínxin juanchangi ndo Jesús á tjaun ndo Pedro ndo Jesús ko ndachro ndo:

—Nchána, ja anta ó no anta kain nge e. Ja anta ó no anta jan an tjaunnta.

Ko ndachro ndo Jesús:

—Siá nduaxin me e, tayakon én kutuchjonna.

¹⁸ Ko naa nge e nduaxin ntatjua ixi nchakon xrachájan ja a, ja ua bakaria mantáa ko bakjia tinó tjaun. Ko nchakon tsotáchría tsinxé tjáa ko inaa ngisen sintekitsaa mantáa ko tsikaan n̄a ti no tjaun a itsjia.

¹⁹ Ti ndachro ndo Jesús xrondachro xranchi tsenxin ndo Pedro ko ji i tachrjexin xranchi tsajon ndo juasaya ngajin ndo Dio. Ko juexin ndachro ndo ji i, íjngo ndache ndo ndo Pedro:

—Rua n̄ana.

Nge e tson en xi ícha tjue e ndo Jesús

²⁰ *Tjume e ndo Pedro tsje e ndo tuenxin ndo ko bikon ndo ixí rué e ndo ícha tjue e ndo Jesús, ndo me e bake e tjenka ti bake e ndo Jesús nchakon juine sen ko tsijanchangí e ndo ndo Jesús ixí ngisen sinchekji ndo.

²¹ Ko ndo Pedro bikon ndo ixí jirué e ndo me e ko juanchangi e ndo ndo Jesús:

—Nchána, ndo ji i, ¿nge e tson en ndo?

²² Ko juate e ndo Jesús:

—Siá tja on xratsechón ndo ti nchakon xrokjan jan an, ja a nge e konda a. Ja a ruenana.

²³ Me ejuangíxin juao sen ixí tsen a ndo me e. Ko je a ndachro ndo Jesús ixí xrokuen a ndo. Na i. Je o ndachro ndo ixí siá tjaun ndo xratsechón ndo nchakon xrokjan je e ndo, nge e kondee je e ndo Pedro.

²⁴ Ndo me e ngisen chronga ixí nduaxin kon en kain ji i, ko ikjin ndo xroon ji i. Ko ó nojna ixí nge e tsikjin ndo, me e nduaxin.

²⁵ Xrajíi kueya nge e juako ndo Jesús kjin a jan an. Siá xrokjin naanaa me e, xrokuitja i nunte xasintajni xrobinga kain xroon ti xrokjin. Jaña tson en.

**Chijnie ndo Jesucristo
Popoloca, San Luís Temalacayuca: Chijnie ndo
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source files
dated 29 Jan 2022

ee37a138-f1b9-51ef-b60f-e89d6de4d06f